


明史彙

列傳自三十二
至三十六

三十七

275
32



漢書門類	
二二	三三
九〇	一〇
八〇	四〇
冊	架

內閣文庫	
二二	三三
九〇	一〇
八〇	四〇
冊	架

內閣文庫	
番號	漢 2231
冊數	80 (37)
函號	281 40

新刊明史彙




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





明史藁

光祿大夫

經筵講官明史總裁戶部尚書加七級臣王鴻緒奉

敕編撰

解

縉湯

宗

鄒

濟

徐善述

王汝玉

陳

壽

尹昌隆

黃

淮



胡

廣

金幼孜

胡儼

解縉字大紳。一字縉紳。吉水人。祖子元。為安福州判官。元末兵亂。守義死。父開與弟闔有名。稱二解。高帝嘗召開論元事。欲官之。辭去。縉年十九。舉鄉試第一。洪武二十一年。與兄綸同舉進士。授中書庶吉士。甚見愛重。嘗侍書帝前。帝親為持硯。帝一日在大庖西室。諭縉朕與爾義則君臣。恩猶父子。當



9321

知無不言。縉遂立草萬言。略曰。臣聞令數改則民疑。刑太繁則民玩。國初至今。將三十載。歲無不變之法。日無無罪之人。臣聞陛下震怒。鋤根剪蔓。誅奸逆矣。未聞詔書褒一大善。賞延於世。復及後昆。始終相保者也。或朝賞而暮戮。或忽罪而忽赦。間多自悔之時。輒有無及之歎。邇年以來。臺綱不肅。以刑名輕重爲能事。以問囚多寡爲勲勞。御史糾彈。皆承密旨。不聞舉善。但曰除奸。及有赦宥。故爲執持。謬謂如此。則上恩愈重。何嘗有持法固爭。謂某不當罪者。臣知陛下輕天下士。正由此輩無以塞上意也。然入人之罪。必謂無私。出人之罪。必疑受賄。逢迎甚易。而輒蒙福。營救甚難。而多得禍。福僅及於一身。禍必延於親黨。又安有舍父母妻子之愛。而犯不測。

者乎。夫連坐起秦法。孥戮本僞書。唐虞之世。四凶止流竄。故殛鯀而相禹。禹不以爲仇。舜不以爲嫌。况律以人倫爲重。而有給配婦女之條。是驅之於不義。教化之原。所由失也。陛下好觀說苑韻府雜書。與所謂道德經心經者。臣謂甚非所宜也。說苑劉向所作。多戰國縱橫之說。韻府出元陰氏猥鄙細儒。鈔輯蕪陋。言無可采。願集今之儒者。臣請執筆隨其後。上泝唐虞夏商周孔。下及關閩濂洛之傳。隨事類別。刪其無益。勒成一書。上接經史。備一代太平之制作。又今六經殘缺。禮記出於漢儒。踳駁尤甚。宜及時改定。更訪求審樂之儒。大集百王之典。作樂書一經。以惠萬世。尊祀伏羲神農堯舜禹湯文武臯陶稷契夷益伊尹。傳說箕子太公周公於太學。而孔

子則自天子至於庶人。通祀以爲先師。以顏曾思孟子配。自
閔子以下。各祭於其鄉。魯闕里仍建叔梁紇廟。贈以王爵。以
顏路曾皙孔鯉配。洗百世之因。仍起昭代之文獻。豈不盛哉。
古者鄉閭善惡必記。今雖有申明旌善之舉。而無黨庠鄉學
之規。互知之法。雖嚴訓告之方。未備。序禮講學。必有其地。有
其時。先之以仁義。而後從之以法制。今也應故事襲虛文。綱
紀不立。節目無依。臣欲取古人治家之禮。睦鄰之法。若古藍
田呂氏鄉約。與今義門鄭氏家範。布之天下。俾世臣大族。身
先以勸。陛下勿視爲迂濶而無當也。陛下天資至高。百家神
怪。誕妄荒忽。旣洞矚之。而猶不免愚天下。若所謂神道設教
者。臣謂不必然也。夫傳國寶者。潞王從珂已焚之矣。屢求屢

得。真偽莫明。卽令真有之。區區李斯之書。秦政之制。何足爲
寶。周武之時。未有神仙符應之說。詩書所載可見。今陛下輿
圖已定。人心已服。天無災變。民無患害。聖躬康寧。子孫萬世。
可謂帝王之真符。何必興師以取寶。愚衆以神仙。冀可字祐
國家者哉。陛下進人不擇賢否。授職不量輕重。建不爲君用
之法。所謂取之盡錙銖。置朋黨倚法之條。所謂用之如泥沙。
監生進士。經明行修。而困於州縣。孝廉人材。純盜虛聲。而或
布朝省。椎埋器悍之夫。闕茸下愚之輩。朝捐刀鐏。暮擁冠裳。
左棄筐篋。右縮組符。故賢者羞爲之等列。士氣日流於頽敗。
以苟免爲得計。以廉潔爲飾詞。出於吏部者。無賢否之分。入
於刑部者。無枉直之辨。黜陟莫準。舉措乖方。八議之條。虛設。

五刑之律無常。至內外百司。筮楚屬官。甚於奴隸。遂使柔懦之徒。亦奴隸其行。以求苟容。非所以勵節義也。臣聞地有盛衰。物有盈歉。而商稅之徵。皆爲定額。盈則奸黠得以侵牟。歉則善良困於補納。夏稅一也。而茶椒有征。果絲有稅。既稅於所產之地。又稅於所過之津。田有高下之殊。科無輕重之別。或膏腴而輕。或瘠鹵而重。此緣里胥丈量之弊。使貧下之家。一遇饑饉。逃亾棄失。始賣產以供役。終產去而役存。是何奪民之利。朘民之生。如此其密也。若夫配天宜復掃地之規。尊祖宜備七廟之制。奉天非筵宴之所。太常非俗樂之司。禁絕倡優。以防淫巧。易置宦寺。無近刑人。執戟陛墀。皆登吉士。虎賁趣馬。悉用俊良。大臣雖有罪勿辱。婦女非犯淫不繫。驅釋

道之壯者。使復人倫。屏經咒之妄者。無滋民惑。絕孤虛之瞽說。申播植之所宜。立均田授田之法。復常平義倉之制。皆今政事之大且亟者。唯陛下幸垂察焉。書奏。帝數稱其才。大臣皆惡之。縉嘗入兵部堂。索阜隸語嫚。尚書沈潛以聞。帝曰。縉以冗散自恣邪。命改縉爲御史。會韓國公李善長死。縉代郎中王國用草疏。爲善長申雪。又爲同官夏長文草疏。劾都御史袁泰。泰深銜之。時詔近臣父皆得入覲。縉父開至。帝召謂曰。大器晚成。若以而子歸。益令進學。後十年來用未晚也。歸八年。帝崩。縉入臨京師。有司劾非詔旨。且言縉母喪未葬。父老不當舍以行。謫河州衛吏。時建文帝任董倫。縉乃遺倫書曰。遠違誨言。遂將十稔。天涯闊異。感念何言。縉率易狂愚。動

遭謗毀。無所避忌。數上封事。所言分封勢重。輔導體輕。萬一不幸。必有厲長吳淠之虞。邨哈木來歸。欽承顧問。謂宜待之有禮。稍忤機權。其徒必貳。此類非一。頗皆億中。又嘗爲王國用草諫書。言韓國事。爲詹徽所疾。欲中以危法。竟致排誣。累迹深文。皆與律令不合。伏蒙聖恩。數對便殿。申之慰諭。重以錙賜。令以十年著述。冠帶來廷。元史舛誤。承命改修。及踵成宋書。刪定禮經凡例。皆已留中。奉親之暇。杜門纂述。漸有次第。洊將八載。賓天之訃。忽聞。痛切欲絕。母喪在殯。未遑安厝。家有九十之親。倚門望思。皆不暇戀。冀一拜山陵。隕淚九土。何圖註誤。蒙恩遠行。揚粵之人。不耐寒暑。復多疾病。俯仰奔趨。伍於吏卒。低回服事。誠不堪忍。晝夜涕泣。恆懼不測。負平

生之心。抱萬古之痛。爲羞於先生長者。是以數鳴知感。冀還京師。得望天顏。少陳情悃。或遂南還。父子相見。卽更生之日也。倫乃薦縉爲翰林待詔。成祖入京師。擢侍讀。命與黃淮楊士奇胡廣金幼孜楊榮胡儼竝直文淵閣預機務。內閣預機務自此始。尋進侍讀學士。帝嘗召縉等曰。爾七人朝夕左右。朕嘉爾恪慎。時言之官中。恆情慎初易。保終難。願與爾等共勉之。因各賜五品服。命七人命婦朝中宮。縉等妻遂謁后於柔儀殿。后嘉勞備至。賜冠服鈔幣而出。帝又以立春日。賜縉等金綺衣。與尚書埒。縉等入謝。帝曰。代言之司。機密所繫。且旦夕侍朕。裨益不在尚書下。皇考初置翰林。其長與尚書同品。倚毗不輕。卿等勉之。已而胡儼出爲祭酒。縉等六人時進

講經史。從容獻納。帝嘗虛已聽之。永樂二年。立皇太子。進縉翰林學士。兼右春坊大學士。縉少登朝。才高任事。直前篤舊。故急患難。引拔士類。如不及。文勁奇。新意疊出。工小楷。狂草。求文翰者。輻輳。表裏洞達。野夫穉子。皆親之。然好臧否。鯁直無顧忌。廷臣多害其寵。而定建儲議。忤漢王。卒以此敗。先是。帝與淇國公丘福等議建儲。福等言。漢王有扈從功。固請立之。帝傍徨未決。召縉密議。縉言。立嫡以長。皇太子仁孝。天下歸心。帝不應。縉又頓首曰。好聖孫。帝領之。太子遂定。漢王由是深恨縉。譖縉洩禁中語。帝欲大發兵討交趾。縉諫不聽。卒發兵平之。而皇太子既立。時時失帝意。帝寵漢王。禮秩踰嫡。縉又諫曰。是啓爭也不可。帝曰。何乃離間我骨肉。遂坐縉廷

試讀卷不公。出爲廣西布政司參議。既行。禮部郎中李至剛。奏縉怨望。改交趾。命督饗化州。翰林檢討王偁。時亦謫交趾。在英國公張輔幕下。縉與共覽廣東山川。謂可鑿贛江通南北。九年。具草奏之。初。縉奏事入京。會帝北征。見太子而還。漢王言。縉伺上出。私覲太子。徑歸。無人臣禮。帝怒。比請鑿江。奏至。帝益怒。逮縉及偁。下詔獄。十三年。錦衣帥紀綱上囚籍。帝見縉姓名。曰。縉猶不死邪。綱退。醉縉酒。埋積雪中。立死。詔籍其家。徙妻子遼東。并其族烏仔等皆徙。縉所牽連。大理丞湯宗。宗人府經歷高得暘。中允李貫。贊善王汝玉。編修朱紘。檢討蔣驥。潘畿。蕭引。高等。多太子宫僚。並牽至剛下獄。方縉居翰林。內官張興。答入左順門外。縉叱之。興斂手退。帝嘗書大

臣名授縉令疏其短長。縉因疏寒義天資厚重中無定見。夏原吉有德有量不遠小人。劉儁雖有才幹不知顧義。鄭賜可謂君子。頗短於才。李至剛誕而附勢。雖才不端。黃福秉心易直。確有執守。陳瑛刻於用法。尚能持廉。宋禮戇直而苛。人怨不恤。陳洽疏通警敏。亦不失正。方賓簿書之才。駟儉之心。帝以付太子。太子亦問尹昌隆。王汝玉。縉對曰。昌隆君子而量不宏。汝玉文翰不易得。惜有市心耳。後仁宗卽位。出縉所疏示楊士奇曰。人言縉狂。觀所論列。皆有定見。不狂也。詔歸縉妻子。官其兄子禎。期中書舍人。縉初與胡廣同侍宴。帝曰。爾二人。生同里。同學。仕又同官。縉有子。廣女可妻之。廣頓首曰。臣妻方娠。未卜男女。帝笑曰。定女矣。已而果生女。遂約婚。縉

子禎亮。縉家徙遼東。廣欲離婚。女截耳誓曰。薄命之婚。皇上主之。大人面承之。有死無二。及赦還。卒歸禎亮。正統元年。詔悉還縉所籍產。復官禎亮。爲中書舍人。始縉言建儲。及討交趾事。用是得禍。縉慘死。漢王高煦卒。以叛誅。而交趾數反。卒棄之。終明世不能復取云。縉兄綸。監察御史。改祠部主事。太祖稱其篤實。改應天教授。居三年。以剛直忤權貴。歸養父。竟不起。禎期卽綸子。亦以書名。

湯宗字正傳。浙江平陽人。洪武末。由太學生擢河南按察僉事。改北平。建文時。上變言。按察司陳瑛受燕王金錢。有異謀。詔逮瑛。安置廣西。而遷宗山東按察使。坐事左遷刑部郎中。出知蘇州府。蘇連歲水。民流逋租百餘萬石。宗諭富民出米。

代輸。永樂元年。有言其坐視水患者。逮下獄。謫判祿州。以黃淮薦。召爲大理寺丞。或言宗曾發潛邸事。帝曰。帝王惟才是使。何論舊嫌。竟擢用之。尋命賑饑河南。還署戶部事。解縉下獄。詞連宗。坐繫十餘年。仁宗立。復大理丞。進左少卿。再進南大理卿。宣宗初。清軍山東。會天久不雨。極陳民間饑困狀。帝爲蠲租免役。罷不急之務。宣德二年卒。

鄒濟字汝周。錢塘人。事母以孝聞。博學強記。尤長春秋。爲餘杭訓導。師法嚴整。遷國子學錄助教。左遷河間教授。以薦知平度州。永樂初。修太祖實錄。書成。除禮部儀制郎中。安南叛。再從幕府。司奏記。還爲廣東右參議。遷吏部郎中。尋擢左春坊左庶子。善訓導。復授皇孫經。濟爲人和易坦夷。自公卿以

下。至武人庸隸。皆樂親之。秩滿進少詹事。當是時。宮僚多得罪。徐善述。王汝玉。馬京。梁潛。周冕。許思溫。及侍郎陳壽輩。皆被讒。相繼下獄死。濟積憂得疾。皇太子以書慰曰。卿善自攝。卽有不諱。當提攜卿息。不使墜入蓬蒿也。卒年六十八。洪熙元年。贈太子少保。諡文敏。命有司立祠墓側。春秋祀之。子幹。字宗盛。濟卒時尚幼。仁宗監國。命爲應天府學生。月賜鈔米。舉正統四年進士。景帝初。由兵部郎中。超擢本部右侍郎。以才爲于謙所倚也。先入寇。鄉民避兵。號城下求入。幹開門納之。調禮部。改建東宮。兼庶子。考察山西官吏。黜布政司侯復。以下五十餘人。巡視河南鳳陽水災。與王竑請賑。遷左侍郎。攝尚書事。成化二年。遣賑畿內饑民。再遷禮部尚書。加太子

少保被劾乞休卒諡康靖幹不悅學嘗抑陳真晟而視水災時臨清諸生伍銘等願輸粟入監讀書幹為請納粟入監自幹始也

徐善述字好古天台人宋亾幼主趨慶元有振義副尉徐某者扼關拒元元兵盡殺徐氏乳媪負幼兒得脫善述高祖也洪武中行歲貢法善述首貢入太學歲餘授桂陽州學正永樂初簡官僚為春坊司直郎見重皇太子每作詩輒令指摘數過乃定時賜書翰遷左贊善太子每稱為先生嘗致書賜酒及詩竟坐累死仁宗即位贈太子少師賜諡文肅命立祠墓側春秋祭如鄒濟云

王汝玉名璫以字行長洲人父立中元末知松江府汝玉穎

敏強記少從楊維禎學年十七舉元末浙江鄉試永樂初由應天府學訓導擢翰林五經博士尋進檢討遷右春坊右贊善預修永樂大典仁宗在東宮特被寵遇嘗與羣臣應制撰神龜賦汝玉第一解縉次之汝玉後進聲名出諸舊臣上與縉及王偁輩互相矜許遂被輕薄名永樂七年坐修禮書紊制度當戍邊皇太子監國宥之以為翰林典籍尋進左春坊左贊善縉之下獄也拷訊急承汝玉及湯宗李至剛李貫朱紘蔣驥潘畿蕭引高高得暘等九人皆逮下獄汝玉及貫紘引高得暘竟瘐死洪熙初追贈太子賓客諡文靖遣官祭於其家

梁潛字用之泰和人洪武二十九年舉鄉試明年授四川蒼

溪訓導。以薦除廣東四會知縣。縣有龍橋河。吏廉平。則河水清。自潛至。迄去。水可鑑。改陽江陽春。皆有治聲。永樂元年。召修太祖實錄。書成。擢翰林修撰。賜白金襲衣文幣。兼右春坊右贊善。代鄭賜總裁永樂大典。被誣。帝召問。抵誣者罪。帝幸北京。屢驛召赴行在。十五年。復幸北京。親擇侍從監國臣。翰林獨楊士奇。以潛副之。時兩京隔絕。漢王高煦謀奪嫡。讒構萬方。有陳千戶者。擅取民財。令旨謫交趾。數日後。念其有軍功。貸之還。有言於帝者。曰。上所謫罪人。皇太子曲宥之矣。遂誅陳千戶。事連潛。及司諫周冕。逮至行在。帝親詰之。潛等具以實對。帝謂楊榮。呂震曰。事豈得由潛。然卒無人爲言。陳千戶本以令旨謫者。潛冕俱繫獄。或毀冕。遂併潛誅。潛妻楊氏。

隨潛在北京。痛潛非命。不食死。子葵進士。仕至浙江左布政使。時稱良吏。

馬京。武功人。洪武中。以進士授翰林編修。歷左通政大理寺卿。建文中。左遷四川按察僉事。永樂元年。召爲行部左侍郎。皇太子守北京。命兼輔導。盡誠翊贊。皇太子甚重之。高煦數毀之。帝謫戍廣西。旣至。猶坐前事下獄。許思溫者。字叔雍。吳人。由國子生。署刑部主事。累遷北平按察副使。靖難時。有城守勞。擢刑部左侍郎。改吏部。兼贊善。亦以漢趙二王譖下獄。二人皆瘐死。仁宗立。贈京少傅。謚文簡。贈思溫尚書。授其子俊太常贊禮郎。進學翰林。

金問。字公素。吳人。兄聲。好古嗜學。問幼事之。如嚴師。家無書。

輾轉借乞。遂博洽經史。聲病熱得螺蚌可療。方嚴寒。問解衣。循河得百枚以進。病良已。永樂初。以善書進。授司經局正字。仁宗在東宮。喜問書。得侍左右。成祖北征歸。入漢趙二王譖。求官僚罪過。遂繫問。與黃淮楊溥等行在獄。三人相得甚。嘗各持一經講論。獄吏曰。此何地。公等乃讀書自喜乎。問笑不。應。或餽遺之。苟非義必謝去。如是者十年。仁宗卽位。乃出之。淮溥相繼入內閣。問待詔思善門。尋授翰林修撰。每論時政。多見采納。正統間。累官禮部右侍郎。子汝進太僕丞。陳壽隨人。洪武中。由鄉舉入太學。授戶部主事。永樂元年。遷員外郎。出爲山東參政。用夏原吉薦。召爲工部左侍郎。皇太子監國南京。壽日陳兵民困。又乘間言。左右于恩澤者多。恐

累明德。太子深納之。嘗目送之。出顧侍臣曰。侍郎中第一人。也。九年。竟坐累死獄中。踰年啓殯如生。仁宗卽位。贈工部尚書。諡敏肅。官其子瑋中書舍人。亦至工部侍郎。壽在獄時。不能給朝夕。官屬有餽之者。拒不受。其勵志如此。

尹昌隆字彥謙。泰和人。洪武中。進士及第。授修撰。改監察御史。建文初。卽位。視朝頗晏。昌隆諫曰。太祖高皇帝。雞鳴而起。昧爽而朝。未日出而臨百官。百官戒懼。故能庶績咸熙。天下乂安。陛下嗣守大業。宜追繩祖武。兢兢業業。憂勤萬幾。今乃卽於晏安。日上數刻。猶未臨朝。羣臣宿衛。疲於候伺。曠職廢業。上下懈弛。播之天下。傳之四裔。非社稷福也。制曰。昌隆所言。切中朕過。禮部可徧行天下。使朕有過。人得而知之。元年。

京師地震。昌隆疏言。奸人專政。陰盛陽微。謫見於天。執政大怒。斥爲福寧知縣。未幾。中使誣昌隆詛咒。下獄。事白得釋。燕兵南下。昌隆上書言。今事勢日去。然北來奏章。動引周公輔成王。不若罷兵息戰。許其入朝。彼既欲伸大義於天下。不應便相違戾。設有蹉跌。便須舉位讓之。猶不失作藩王。若沈吟不斷。禍至無日。進退失據。雖欲求爲丹徒布衣。不可得矣。不報。燕王入京師。命捕齊黃黨。并及昌隆。驅出就戮。昌隆當陞大呼曰。臣曾上章。勸以位讓陛下。奏牘可覆按也。帝乃命緩昌隆刑。閱其奏流涕曰。火燒頭。若早從此言。則南北生靈受禍。不若是酷。朕亦無此勞苦也。詔特貸昌隆死。且諭之曰。朕長子在北京。爾往事之。盡誠輔導。朕不念爾。昌隆頓首謝。乃

授北平按察司知事。永樂二年。冊立皇太子。授左春坊中允。隨事匡諫。太子甚重之。後改禮部主事。尚書呂震用事。羣臣無比。當其獨處。精思。以手指刮眉尾。則必有密謀深計。官屬相戒。無敢白事者。昌隆以事白。震怒不應。移時又白之。震愈怒。拂衣起。昌隆退。白東宮。取令旨行之。震大怒。奏昌隆假托宮僚。陰欲樹結。潛蓄無君心。初帝欲立高煦爲太子。金忠力爭。帝以問昌隆。昌隆以忠言爲是。帝不能奪。而心銜之。乃逮昌隆下獄。尋遇赦。復官。父憂起。復謁震。震溫言接之。入理前奏。繫昌隆錦衣衛獄。且籍其家。帝方巡幸。凡下詔獄者。率輿以從。謂之隨駕重囚。昌隆與焉。後數年。谷王謀反。事發。辭連昌隆。以王曾奏昌隆爲長史。坐以共謀。詔公卿雜問。昌隆辯

不已。震折之。昌隆知不免。乃無言。獄具置極刑。死夷其族。後震病且死。號呼尹相尹相。言見昌隆守欲殺之云。

董倫字安常。恩人。洪武十九年。以張寧薦。授春坊贊善大夫。左春坊大學士。侍懿文太子。太子薨。出為河南左參議。上書薦肇州吏目諸葛伯衡。帝遽擢陝西參議。又言儒學訓導。宜與冠帶別於士子。帝從之。訓導始注選。後謫雲南教官。建文初。召拜禮部右侍郎。兼翰林院學士。與方孝孺同侍經筵。賜御書怡老堂。髹几一。玉鳩杖一。解縉謫河州。貽倫書求援。言於帝。召之還。倫質直敦厚。屢勸帝睦宗藩。不聽。成祖即位。倫年已八十。命致仕。數日卒。

黃淮字宗豫。永嘉人。父性。方國珍據溫州。遜跡避偽命。淮以

洪武三十年進士。授中書舍人。成祖即位。召對稱旨。命入翰林。使與解縉常立御榻左。備顧問。或至夜分。帝就寢。猶賜坐榻前語。既而與縉等七人。竝直文淵閣。遷翰林院編修。進侍講。時有告黨逆者。淮言於帝曰。洪武末年。已勅禁矣。不宜復理。吏部追錄南人官北地。不即附者。皆論戍。淮曰。得毋示人不廣邪。帝皆從其言。罷之。議立太子。淮請立嫡以長。太子立。遷左庶子兼侍讀。永樂五年。遷左春坊大學士。兼輔導太孫。七年。帝北巡。詔皇太子監國。淮及蹇義金忠楊士奇留守京師。明年。長沙妖人李法良作亂。皇太子命豐城侯李彬討之。漢王高煦忌太子有功。阻彬師。淮曰。彬老將。必能克賊。願急遣彬卒擒法良。阿魯台納款。請得役屬吐番諸部。且求刻金

作誓辭。因磨其金酒中。飲諸酋長以盟。朝議欲許之。淮曰。不可。此狼子野心。力分則易制。一難圖也。帝顧左右曰。黃淮論事。如立高岡。無遠不見。帝刻玉印。賜西域僧大寶法王。淮曰。朝廷賜諸番制敕。用敕命廣運二寶。今此玉大過之。非所以示西人尊朝廷。帝嘉納之。十一年。帝再北巡。淮居守。遷翰林學士。漢王譖太子益急。帝還。太子遣使迎稍緩。又書奏失辭。遂悉徵東宮官屬。淮先至。行在。諸臣交劾。下詔獄。淮在詔獄。十年。仁宗卽位。釋爲通政使。兼武英殿大學士。仍領內閣事。丁母憂。命乘傳奔喪。乞終制。不許。尋進少保。戶部尚書。兼武英殿大學士。命三俸兼支。辭尚書俸。許之。時皇太子謁孝陵。遂留南京監國。而帝疾甚。命淮等書詔召太子。未至。帝崩。大

臣疑懼。淮佐鄭王襄王居守。待太子至。始發喪。及宣宗卽位。親征漢庶人。淮病不從。留守如故。旣而上疏。乞骸骨歸。許之。初永樂間。淮與解縉胡廣楊榮楊士奇等。俱在內閣。帝從容問廣曰。士奇文學。於今難得。而淮數不容之。何也。廣對曰。淮有政事才。士奇文學勝。縉每重士奇及臣。而輕淮。故致憾。帝曰。固知爾亦不容於淮。朕終不爲所惑。後縉之謫。或言淮有力焉。至是諸臣入侍。淮適未至。宣宗問淮何在。楊榮以病瘵對。且言此疾能染人。帝故不時召。因從其請。淮歸。父性年九十矣。淮奉養甚歡。性卒。賜葬祭。淮詣闕謝。值燈時。賜大臣侍從。西苑。詔淮得乘肩輿。登萬歲山下。宴山麓。又名其子采從行。尋命充會試主考官。及辭歸。餞之太液池。帝作長歌送之。

且曰朕生日卿宜復來。明年入賀。至英宗立再朝。皆宴賜極歡。乃罷。淮歷事六帝。致仕二十餘年。正統十四年卒。年八十三。諡文簡。有省愆集。蓋在繫十年所作。

胡廣字光大。吉水人。父子祺自有傳。建文二年。廷試策問堯舜之世。親則象傲。臣則共鯨之凶。意在燕王。廣對策有親藩陸梁。人心搖動語。帝擢廣第一。更名靖。授翰林修撰。成祖卽位。廣偕解縉迎附。擢侍講。改侍讀。復名廣。遷右春坊右庶子。兼侍讀。進翰林學士。兼左春坊大學士。尋拜文淵閣大學士。兼官如故。帝北征。廣與楊榮金幼孜從。時時召語帳殿。過山川阨塞。立馬議論。或時失道。必遣騎亟求諸學士。諸學士追帝不及。嘗脫衣乘馬渡河。河水沒馬。及腰以上。帝顧勞良苦。

廣善書。每勒石皆令書之。帝征瓦剌。皇長孫從。命講經史行在所。廣以醇謹見幸。時人以方漢胡廣。帝命西僧爲法會。言見諸異應。廣乃獻聖孝瑞應頌。帝綴爲佛曲。令宮中歌舞之。禮部郎中周訥請封禪。廣言其不可。遂不許。廣上却封禪頌。帝益親愛之。廣縝密。帝前所言。及所治職務。出未嘗語人。侍講王洪不得爲學士。密疏廣父子祺。知延平府以罪死。廣與修實錄。不當隱其事。帝知子祺實死於官。遂不直洪。已而命廣擇主鄉試者。廣以洪名上。已得請。而洪復訐子祺事。帝怒奪其禮幣。出爲禮部主事。洪恚死。廣丁母憂。召還。帝問百姓安否。廣對曰安。但郡縣窮治建文時奸黨。株及支親爲民厲。詔悉罷之。永樂十六年卒。年四十九。贈禮部尚書。諡文穆。仁

宗卽位。官其子種。爲翰林檢討。加贈廣少師。文臣得諡。自姚廣孝及廣始。

金幼孜名善。以字行。新淦人。建文二年進士。授戶科給事中。成祖卽位。改翰林院檢討。與解縉等同直文淵閣。遷侍講。時翰林坊局臣。講書東宮。皆先具經義。閣臣閱正。呈帝覽。乃進講。解縉書。楊士奇易。胡廣詩。幼孜春秋。因進春秋要旨三卷。五年。遷右春坊右諭德。兼侍講。七年。從幸北京。八年。北征。幼孜與廣榮從。駕駐清水源。有泉出焉。幼孜獻銘。榮獻詩。皆勞以上尊。帝重幼孜文學。所過山川要害。輒命記之。有敕旨屬幼孜等。據鞍起草立就。使自瓦剌來。帝召幼孜等。傍駕行。與語。瓦剌事。親倚甚。嘗與廣榮及侍郎金純失道。陷橐駝谷中。

暮夜帝遣使十餘輩迹之不獲。時幼孜墜馬。廣純去不顧。榮爲結鞍行。行又輒墜。榮以所乘馬予幼孜。明日始及行在所。帝嘗輕騎逐利。幼孜請從。帝曰。戰非爾事也。乃止。自後北征皆扈從。先後撰北征二錄。十二年。遷翰林學士。兼諭德。十八年。拜文淵閣大學士。兼學士。二十二年。幼孜與榮從北征。次開平。帝謂榮幼孜曰。朕夢神人語上帝。好生者再。是何祥也。榮幼孜遽請班師。帝然之。卽命草詔。招諭諸部。還軍至榆木川。帝崩。軍中戒嚴。祕不發喪。榮南訃。幼孜留行在。以待太孫至。及仁宗卽位。拜戶部右侍郎。兼文淵閣大學士。尋加太子少保。兼武英殿大學士。專典內制。賜繩愆糾繆銀章。諭政有闕失。密疏聞用此識。洪熙改元。遷禮部尚書大學士。學士如

故命與士奇榮會讞法司囚。幼孜善律法多平反。既乞還省母。宣德元年母卒。起復為總裁官。修兩朝實錄。明年持節寧夏。冊慶府兩郡王妃。還上封事。從巡邊度雞鳴山。帝曰。唐太宗恃其英武。征遼常過此山。幼孜對曰。太宗尋悔是役。故為建憫忠閣。帝曰。此山崩於元順帝時。為元亾徵。對曰。順帝亾國之主。雖山不崩。國亦必亾。六年卒。贈少保諡文靖。幼孜臨卒。家人囑請身後恩。曰。此君子所恥。不聽。子昭伯。宣德中進士。

胡儼字若思。南昌人。博學於天文地理律曆醫卜無不究。舉洪武二十年鄉試。授華亭縣教諭。能以師道自任。母憂服除。改長垣。乞便地就養。復改餘干。因著為令。許人乞便地。自儼

始。建文元年。薦授桐城知縣。鑿桐陂水。溉田為民利。虎傷人。儼齋沐告於神。虎遁去。桐人祀之。朱邑祠。四年。副都御史練安薦於朝。曰。儼學足達天人。智足資帷幄。比召至。燕師已渡江。成祖即位。曰。儼知天文。其令欽天監試。既試。奏儼實通象緯氣候之學。尋又以解縉薦。授翰林院檢討。與縉等俱直文淵閣。遷侍講。進左春坊左庶子。兼侍講。父憂起復。儼在閣承顧問。應對從容。嘗不欲先人。然為人少戇。雖委曲。終不俯仰。取容悅。同列因言。儼學行宜為師表。乃解機務。拜國子監祭酒。時用法嚴峻。國子生或託事告歸。輒坐戍邊。儼至即奏除之。儼在國學。凡朝廷著作。多命儼。修高皇帝實錄。永樂大典。皆為總裁官。帝幸北京。以給事中胡濙署監事。召儼赴行在。

八年。帝北征。命以祭酒兼侍講。掌翰林院事。輔皇太孫留守北京。十九年。改北京國子監祭酒。當是時。海內混一。垂五十年。民物滋殖。嘉祥畢至。帝方內興禮樂。外懷要荒。公卿大夫文學之士。彬彬以潤色鴻業為事。儼館閣宿儒。為時冠冕。以身率教。動有師法。居國學者二十餘年。洪熙改元。以疾乞休。帝賜敕獎勞。進太子賓客。仍兼祭酒致仕。免子孫徭役。宣宗即位。以禮部侍郎召。辭歸。先後家居。亦二十年。正統八年卒。年八十三。

明史彙

列傳第三十二終

明史彙

列傳第三十三

光祿大夫 經筵講官明史總裁戶部尚書加七級臣王鴻緒奉

敕編撰

楊士奇

陳張

山瑛

楊

榮

曾孫

旦

楊溥

馬愉

高穀

曹鼐

張

益

楊士奇名寓。以字行。泰和人。早孤。母陳改適羅氏。攜士奇往。已復宗貧甚。力學授徒自給。多游湖湘間。館於江夏最久。建文初。集諸儒修太祖實錄。士奇已用薦徵教授。當行。王叔英復以史才薦。遂入翰林。與編纂事。尋命吏部考第史館諸儒。尚書張統得士奇策曰。此非經生言也。奏第一。授吳王府審理副。仍供職翰林。成祖即位。改編修。已簡入內閣典機務。士

奇善應對。舉止恭慎。籌天下事。輒微中。帝甚嘉之。數月進侍講。永樂二年。選東宮官。以士奇爲左中允。進左諭德。士奇奉職甚謹。私居不言公事。雖至親厚不得聞。論事帝前。不爲亢言激論。視帝所向。因而成之。又善掩覆人過。廣東布政徐奇。載嶺南土物饋廷臣。或得其目以進。帝閱無士奇名。召問對。曰。方奇赴廣。羣臣皆作詩贈行。臣病弗能往。以故獨不及。今受否未可知。且物微。當無他意。帝遽命燬其目。帝北巡。士奇留輔太子。從容規勸。太子待之甚恭。太子喜文辭。贊善王以玉以詩法進。士奇曰。殿下聽治暇。當留意六經。否則兩漢詔令可觀。雕蟲小技不足效也。太子稱善。初帝起兵時。漢王數力戰有功。帝許以事成立爲太子。旣而不得立。不能無望。而

帝又憐趙王少寵異之。由是兩王合而間太子。帝頗心動。九年還南京。召士奇問監國狀。士奇以孝敬對。且曰。殿下天資高。卽有過必知。知必改。存心愛人。決不負陛下託。帝悅。十一年。正旦日食。禮部尚書呂震請勿罷朝賀。士奇不可。引宋仁宗事以諷帝。免賀。及宴。明年帝北征。士奇仍留輔太子。漢王譖太子益急。帝頗信之。會太子所使迎帝者緩。且奏書失辭。遂下侍讀黃淮獄。士奇後至。帝宥之。召訊太子事。士奇頓首言。太子孝敬如初。凡所稽遲。皆臣等罪。帝意解。行在諸臣交章劾士奇不當獨宥。繫錦衣衛。尋釋之。十四年。帝還南京。微聞漢王謀奪嫡。及諸不軌狀。以問蹇義。義不對。乃問士奇。士奇亦不敢言。帝詰之。對曰。臣與義俱侍東宮。外人無敢爲臣

言。臣故不知。然漢王兩遣就藩。皆不肯行。又知陛下將徙都。輒請留守南京。意叵測。惟陛下善處。全父子恩。帝默然起還宮。居數日。帝已盡得漢王事。削兩護衛。處之樂安。尋進士奇翰林學士。兼故官。留輔如故。十九年。改左春坊大學士。仍兼學士。明年。復坐輔導有闕。再繫錦衣獄。旬日而釋。又明年。帝崩於軍。訃至。太子與士奇謀。命太孫出居庸關。至開平迎喪。與之東宮。故章而遣之。謂士奇曰。卿與蹇義勞苦。吾自知之。今且重用。士奇曰。大行見背。陛下宜收人心。恩當先。扈從征行之臣。臣兩人不應先及。已而梓宮至。太子發喪卽位。立擢士奇禮部侍郎。兼華蓋殿大學士。帝御便殿。蹇義夏原吉奏事未退。士奇至。帝望見。謂二人曰。新華蓋學士。必有讜言。共

聽之。士奇言。恩詔甫下二日。惜薪司傳詔。賦棗八十萬斤。民何以堪。帝喜。立命減其半。易月制滿。呂震請卽吉。士奇不可。震厲聲叱之。蹇義兼取二說進。明日。帝素冠麻衣。絰而視朝。廷臣惟士奇及英公輔。服如之。朝罷。帝謂左右曰。梓宮在殯。易服。豈臣子忍言。士奇執是也。尋進少保。與同官楊榮。金幼孜。竝賜銀章。得密封言事。文如蹇夏二尚書。大理卿虞謙。言事過激。帝怒。降謙一官。士奇言謙不當降。帝立復之。尋進少傅。密疏言事。帝悅。璽書獎勞。賜鈔幣白粲。時藩司守令。皆朝京師。尚書李慶言於帝。發軍伍餘馬給。有司歲課其駒。士奇持不可。慶恚不聽。士奇獨奏曰。朝廷選賢授官。乃使牧馬。是貴畜而賤士也。何以示天下。後世且賢者。誰肯復仕乎。帝許

中旨罷之。已而寂然。士奇言之。又不報。有頃。按察使陳智亦上章言。畜馬非是。帝乃御思善門。召士奇謂曰。朕向者非真忘之。聞李慶呂震皆不喜卿。朕念卿孤立。恐爲所傷。不欲因卿言罷耳。因出智章。使草敕行之。士奇頓首曰。陛下知臣臣不孤矣。帝曰。今事有不便。密與朕言。李慶輩不識大體。不足語也。已羣臣習朝正儀。詔勿用樂。呂震建議仍用之。士奇與黃淮疏止。未報。乃復奏待庭中。至夜漏十刻。報可。越日。帝召語曰。震每事誤朕。非卿等言。悔無及。明年。命兼兵部尚書。並食三祿。士奇辭不允。乃辭尚書祿。於是黃淮亦辭尚書祿。帝監國時。憾御史舒仲成。至是欲治其罪。士奇曰。若治仲成。則詔書不信。前得罪者皆懼矣。漢景待衛綰事足法也。帝卽罷

弗治。而勞士奇厚賜之。尋與田二頃。士奇又辭。且曰。臣起寒微。受恩。嘗恐不勝。幸延殘喘。得更事陛下二三年。獲全首領。歸故里。爲賜多矣。帝曰。朕在卿無憂。乃勿予田。尋修太宗實錄。士奇與黃淮楊榮金幼孜楊溥。並爲總裁官。賜士奇圖印。曰。貞一。并以璽書褒之。人有上書頌太平者。帝召諸大臣示之。皆以爲然。士奇獨曰。未也。陛下雖澤被天下。然流徙尚未歸。瘡痍尚未復。耕鑿之民。尚未給。必加數年休息。庶幾人各得其所。帝笑曰。此朕意也。朕待卿等。以至誠。望匡弼。惟士奇嘗有論說。餘無一言。豈果朝政無闕。臣民皆安乎。諸臣慚謝。亾何帝崩。士奇等入受遺詔。輔太子。宣宗卽位。修仁宗實錄。士奇等仍爲總裁。宣德元年。漢王反。帝親征。破擒之。師還。次

單橋侍郎陳山迎謁。因請乘勝襲彰德。執趙王。榮力贊決。義原吉亦以爲然。榮遂以帝意。令士奇草勅。數趙王罪。士奇曰。事當有實。天地鬼神可欺乎。吾不能爲辭也。榮厲聲曰。汝欲撓大計邪。今逆黨言實與趙謀。何患無辭。士奇曰。太宗皇帝惟三子。今上惟兩叔父。有罪者不可赦。其無罪者厚待之。疑則嚴防之。使無虞而已。何遽加兵。傷皇祖在天意乎。時惟楊溥與士奇合。請皆入以死諍。榮已先入。二人繼之。閹者不納。尋召義原吉入。以士奇言白帝。帝意不懌。而移兵事亦罷。自是道中有顧問。士奇溥皆不及。比至京師。帝始思士奇言。謂曰。今議者喋喋。多言趙王事。奈何。士奇曰。趙最親陛下。當保全之。毋惑羣言。帝曰。吾欲封羣臣章。示王令自處。何如。士奇

曰善。更得一璽書。幸甚。於是發使奉書至趙。趙王得書大喜。泣曰。吾生矣。卽上表謝。且獻護衛言者頓息。帝待趙王日益親。而溥陳山謂士奇曰。趙王所以全。卿力也。賜白金文綺楮幣。時交趾數叛。再發大軍征討。皆敗沒。交趾黎利遣人僞請立陳氏後。帝亦厭兵。欲許之。英公輔以下皆言。此賊狡不可聽。當益發兵誅之。與之無名。徒示弱天下。帝召士奇。榮謀力言許黎利便。且以漢棄珠厓。專恤關東爲法。帝意遂決。夏原吉初言不當棄。繼亦言棄之便。於是盡以十七府地。畀黎利。乃罷兵。歲省軍興鉅萬。而中國兵威亦小。諸遠夷朝貢。多不至者。帝以四方屢水旱。召士奇議。首免災傷租稅。及畜產虧額者。士奇因請。并蠲逋負薪芻錢。減官田額。罷徵求。平冤

悔之。而士奇等不能力諍也。帝初卽位。內閣臣七人。陳山張瑛以東宮舊恩入。不稱。出爲他官。黃淮以老致仕。己而金幼孜卒。閣中惟士奇榮溥三人在。榮疏闔果毅。遇事敢爲。數從成祖北征。典戎旅。能知邊將賢否。阨塞險易遠近。敵情順逆。然頗通饋遺。邊將歲時致良馬畜產甚饒。帝頗知之。問士奇。士奇力言榮無他。曉暢邊務。臣等不及。不宜以小眚介意。帝笑曰。榮嘗短卿及原吉。卿乃爲之地邪。士奇曰。願陛下以曲容臣者。容榮。帝意乃解。其後語稍稍聞。榮以此媿士奇。相得甚驩。帝亦益親厚之。所賜珍果牢醴金綺衣幣書器無算。宣德十年帝崩。皇太子方九齡。內庭頗有異議。士奇榮與英公輔入臨。退請見太子於文華殿。頓首呼萬歲。羣臣皆賀。浮言

乃止。英宗卽位幼冲。軍國大政。輒關白太皇太后。太后推心任士奇等三人。有事遣中使詣閣諮議。然後裁決。三人者亦自信侃侃行意。首請練士卒。嚴邊防。設南京參贊機務大臣。分遣文武鎮撫江西湖廣河南山東。罷偵事校尉。設屯田。減漕運。開經筵。擇儒臣講學。太后甚喜。又以次蠲租。慎獄。嚴覈百司。以故正統之初。朝政清明。中外臣民翕然皆稱三楊。以居第目士奇曰西楊。榮曰東楊。而溥嘗自書郡望曰南郡。因目爲南楊。三年。士奇進少師。四年。歸省墓。未幾還。是時中官王振頗機警。能得帝歡。思攬外庭事。畏太后不敢肆。靖江王佐敬私饋榮金。榮先省墓歸。不之知。而振欲借傾榮。士奇力解之。得已。振自此捃摭大臣短。勢漸熾。比榮卒。士奇溥益孤。

其明年遂大興師討麓川蠻幸而勝之帑藏耗費而士馬物故亦數萬振乃自以為功其明年太皇太后崩振益輕二人不復咨白大作威福黜陟百官小有牴牾輒執而鞭繫之廷臣人人惴恐而士奇溥依違其間無所救正士奇既老子稷傲很嘗陵長吏至侵暴殺人或告士奇稷乃訐告者私事誑士奇士奇輒信稷稷惡日甚士奇不得聞於是言官交章劾稷朝議以士奇故不卽加法而封其狀示士奇已復有發稷橫虐數十事下之理士奇已老疾在告天子恐傷其意降詔慰勉士奇感泣憂不能起九年遂卒年八十贈太師諡文貞有司乃論稷罪當大辟士奇卒兩月稷瘐死獄中士奇能推轂寒士見一詩一文善輒薦達之有初未識面者次子導字

叔簡少豪放後折節向學博涉經史能詩賦談論娓娓一時大臣子能文者稱導以廕補尚寶丞成化中遷為卿久之上言尚寶司官才可用者宜以例推舉報可竟不舉導不能平乞改南京秩滿進太常少卿仍掌司事卒山沙縣人宣帝為皇太孫以給事中侍講讀進左庶子比嗣位進戶部侍郎拜尚書兼謹身殿大學士一日帝問士奇山何如人對曰山寡學多欲昧大體非君子也帝曰然趙王事幾為所誤近聞其日干諸司不可溷內閣遂命輟機務專授小內使書久之致仕卒瑛邢臺人亦以給事中侍皇太孫善承風旨得太孫歡宣宗卽位擢禮部侍郎進尚書兼文華殿大學士帝北巡與駙馬袁容隆平侯張信等居守時帝銳精勵治委任之楊瑛

以舊恩參其間。委蛇受成而已。雖極恩遇。帝勿之重也。四年。出爲南京禮部尚書。久之仍入閣。正統元年卒。

楊榮字勉仁。建安人。初名子榮。建文二年進士。授編修。燕王初入京。榮迎謁馬首曰。殿下先謁陵乎。先卽位乎。王憮然曰。先謁陵。自是遂受知。既卽位。簡入內閣。爲更名榮。同直七人。榮最少。最警敏。一日晚。寧夏報被圍。召七人皆已出。獨榮在。帝示以奏曰。今發何地兵。榮曰。不必發也。臣嘗使至彼。城堅人習戰。奏上已十餘日。圍解矣。夜半奏圍解。帝謂榮曰。何料之審也。帝嘗御左順門。出江西撫賊奏。示榮曰。都督韓觀宜勞。榮曰。計發奏時觀未至。不得論功。帝益重之。尋進修撰。帝或與諸大臣謀未決。至發怒。榮至。輒爲霽威。事亦隨決。進侍

講。修列女傳成。賜襲衣鈔幣。已進右諭德。仍兼侍講。與在直諸臣同賜象笏朝衣及二品服。召評議諸司事宜稱旨。復賜衣幣。有寒疾。命醫守之。賜藥餌。五年。命往甘肅。經畫軍務。所過覽山川形勢。察軍民閔城堡。還奏武英殿。帝大悅。值盛暑。親剖瓜噉榮。且賜牢醴。尋進右庶子。侍講如故。明年。以父喪給傳歸。既葬。起復視事。明年。母喪乞歸。帝以北行期迫不許。發京師。與胡廣金幼孜從。甘肅守將何福言。脫脫不花等部衆請降。需命於亦集乃。以榮嘗往甘肅得要領。遣持節封福寧遠侯。因至寧夏。與寧陽侯陳懋規畫邊務。還陳便宜十事。帝嘉納之。賜衣幣。明年。從出塞。賜衣衾鞍馬。道中給大官饌。度野狐嶺。召榮及廣。指示山川聚落。語良久。奉制馬上賦詩。

榮詩有寇自相殘語。已而謀言本雅失里。與其下阿魯台相攻。皆竄走。帝謂榮曰。卿詩驗矣。復賜之牢醴。已發凌霄峰。與幼孜等陷山谷中。帝令軍中四出求。得之喜動顏色。知幼孜賴榮易馬得還。益多榮。次臚胸河。親選勇士三百人爲衛。不以隸諸將。而令榮領之。班師軍乏食。榮請盡以供御之餘。給軍。而令軍中有餘者得相貸入塞。官爲倍償。軍賴以濟。至開平。使榮齎報南。太子復返迎帝。俱歸京師。帝與太子竝厚賜之。明年乞奔喪。賜金幣。中官護行。還詢閩中民情。及歲豐歉。榮具以對。給大官酒饌。復其家。已侍諸皇孫。讀書文華殿。講授有程度。皇太子稱之。十年甘肅守臣宋琥言。叛寇老的罕。逃赤斤蒙古。且爲邊患。乃復使榮至陝西。會豐城侯李彬。

議進兵方略。榮以隆冬非用兵時。且有罪不過數人。歸奏兵未可出狀。帝從其言。叛者亦降。明年復與廣幼孜從北巡。明年征瓦剌。太孫侍行。帝命榮以間陳說經史。兼領尚寶事。凡宣詔出令。及旗志符驗。必得榮奏。乃發。帝常晚坐行幄。召榮計兵食。榮對曰。擇將屯田。訓練有方。耕耨有時。卽兵食足矣。比還北京。命修五經四書性理大全。書成宴勞之。留北京二年。進翰林學士。仍兼庶子。從還京師。明年復從北巡。十六年。太祖實錄成。宴勞如初。會胡廣卒。榮遂掌院事。益見親任。諸大臣多忌榮。欲疎之。共舉爲祭酒。帝曰。吾固知其可。第求代榮者。諸大臣乃不敢言。尋修天下郡邑志。命榮總之。榮知帝意向已。悉發府部院寺諸曹積弊以聞。帝曰。爾言固當。獨不

畏諸臣忌乎。榮退。密令御史鄧真入奏。帝因下詔。切責諸大臣。諸大臣皆免冠頓首請罪。十八年。進文淵閣大學士。兼學士如故。明年。定都北京。會三殿災。將及祕閣。榮麾衛士。使出圖籍制誥。昇東華門外。帝召榮褒賜之。榮因與幼孜。陳便宜十事。報可。榮論事激發。不能容人過。然羣臣或觸帝怒。致不測。輒從旁寬譬之。侍讀李時勉。尚書夏原吉。皆以榮言得無死。都御史劉觀。以榮言得無戍邊。榮善探人主意。談言微中。以故其說得行。嘗謂人曰。事君有體。進諫有方。爲人臣以佞直賈禍。吾不爲也。明年。復從出塞。軍事大小。令參決。賚予優渥。師還。宴將士。榮與幼孜。皆受上賞。已復下詔西征。有言調建文時。江西所集民兵。帝問榮。榮曰。陛下許民復業。且二十

年。一旦復徵之。非示天下信。從之。明年。從征西。駐萬全。軍務悉委榮。晝夜見無時。帝時稱楊學士不名也。也先土干款塞。羣臣議莫定。榮獨請往。受降而歸。師旋。明年。復北征。當是時。帝凡五出塞。榮幼孜。輒從。周旋險阻。未嘗頃刻離。大軍抵答蘭河。敵遠遁。師亦敝。帝問羣臣。當復前否。羣臣唯唯。榮與幼孜。獨請班師。帝許之。時浙江守臣言。浙麗水與閩政和山賊熾。請發兵。榮曰。愚民苦有司。不得已相聚。兵出將益聚。不可解。遣一介往撫。可不煩兵。如其言。盜果息。帝御帳殿。從容語榮。幼孜曰。東宮監國久。明習政務。今歸。當付以國事。朕將老焉。二人頓首。還次榆木川。帝崩。中官馬雲等。莫知所措。密召榮。幼孜入御幄。議喪事。二人議六師在外。去京師尚遠。祕不

發喪以禮斂載龍輿所至朝夕進膳如常儀益嚴軍令人莫測或請因他事爲敕遣人馳報太子二人曰誰敢爾先帝在則稱敕賓天而稱敕詐也罪不小衆曰然乃命中官具大行崩月日及遺命傳位意啓太子榮遂與少監海壽先馳報太子復陳軍中所宜行者太子領之明日議赦詔榮首條民間不便二十餘事竝納之卽位賜榮金幣雜物加等進太常卿餘官如故尋進太子少傅謹身殿大學士旣而有言榮當大行時所行喪禮及處分軍事狀帝璽書褒勞賜白金鈔幣白粲進工部尚書食三祿仁宗崩宣宗卽位漢王反皇太后召榮等定計榮請親征太后帝俱有難色榮曰彼謂陛下新立必不自行故敢爾出不意以天威臨之事無不濟臣請先驅

太后壯之勸帝從其計榮卽晝夜疾馳至樂安卽合圍督軍中築土山山成而車駕至衆呼萬歲聲震城中漢王懼開門出降師還以決策功受上賞賜銀章五袞予甚至宣德三年帝北征出喜峰口榮與楊溥皆從大獲而還榮獻詩十章又明年兩朝實錄成宴勞有加尋進少傅食三祿如故辭大學士祿九年復從北巡給名馬光祿寺日供酒饌至洗馬林而還英宗卽位委寄如舊賜予相屬五年乞歸展墓帝使中涓輔行還至武林驛而卒年七十贈太師諡文敏授世都指揮使榮歷事四朝謀而能斷中官持文書至閣必問東楊在否不在卽去嘗會廷臣錄囚片言立決衆皆歎服尤喜賓客善交際雖貴盛無厓岸士多歸心焉或謂榮處國家大事隨機

應變不媿唐姚崇而不拘小節亦頗類之家富曾孫曄爲建安指揮以貲敗曄從弟旦字晉叔弘治中進士爲吏部郎中持正有風采遷太僕寺少卿改太常劉瑾要往見不可左遷知温州府居二年治最遷浙江提學副使瑾誅入爲應天丞進尹擢南禮部右侍郎攝國子監事與尚書張燦喬宇請擇宗室爲儲貳計不聽入爲禮部右侍郎掌太常寺事已改戶部督京通倉出理餉甘肅還進右都御史總督兩廣討平番禺清遠河源諸獠斬首萬計以母憂歸嘉靖初起掌南院就遷戶部尚書改吏部張璁桂萼驟遷學士旦率九卿極言不可會吏部尚書喬宇罷召旦代之未至爲給事中陳洸所劾勒致仕年七十餘卒真字存誠江夏人永樂九年進士授御

史坐事降行人尋復爲御史十七年受榮指條時弊十事以奏曰吏部職銓選洪武中內外諸司官吏皆有定員今率倍增冗濫已甚徒糜俸廩無益事實至考滿官到部當辨其才品優劣年勞久近以爲黜陟今有三五考七八考不得遷一級有未滿一二考卽遷數級者進士監生出身自有定例今或驟除方面或除知州及府佐貳或除典史吏目遲速懸絕輕重不倫此吏部之弊也戶部職出納今郡邑稅糧積逋或至數年不能鉤考顧以催徵爲名遣官四出曠歲不還剝削紛紜致田里不安長官明知略不舉奏其諸色稅糧旣入倉而倉吏盜賣虛出通關者有之未入倉而有司扶同爲奸偽造通關者有之詐詭百端毫無覺察此戶部之弊也禮部職

禮儀凡遠方朝貢至者。應卽奏聞。以禮賓接。事畢之日。宜速遣還。今或旬日不引奏。或竣事不遣。應頒賞賚。故有留難。失遠人心。而傷國體。此禮部之弊也。兵部職軍旅。凡天下兵馬。多寡虛實之數。皆當周知。時時鈎校。今乃不詰戎備。不討軍實。卒伍曠缺。或數年不補。孳生種馬。或累歲不賞。諸衛因之。互相蒙蔽。此兵部之弊也。刑部都察院職刑名。奏當明允。人心乃服。今乃是非顛倒。出入失中。使人抱枉銜冤。甚者淹禁數年。委而不問。至審錄之際。皇上屢降德音。務存寬恤。而所司專事刻深。鍛鍊周內。大理職在平反。今乃一槩附和。隨其重輕。曾無駁正。此刑官之弊也。工部職營建。今惟北京宮殿最急。其他興作。皆在可緩。乃不度民力。不審時宜。採辦物料。

以科百。以十科千。騷擾民間。匠人有累歲受役。不放遣者。有一日不役。出錢自便者。勞逸不均。人多怨讟。又洪武中定制。軍器非應留操備者。悉貯官庫。其有損壞。就各衛軍器局修理。不容私造。今平民或擅挾軍器。或私藏諸家。或公行鬻賣。又洪武中。官府採辦物料。只收本色。民自赴官交納。今有漁利之術。不取本色。而折收鈔幣。科取常十數倍。朘民脂膏。厭其谿壑。此三者。皆工部之弊也。洪武中。各衛官旗軍士。編成隊伍。各有定屬。今乃變亂成法。或擅收他衛士入伍。或藏匿奸慝。爲逋逃藪。且一軍有缺。卽當勾補。今衛所官吏。惟貪貨賄。軍伍缺乏。恬不爲意。遣入勾補。得錢縱放。百無一二到衛。有到衛而官吏受賂。仍放免者。行伍空虛。日甚一日。此二

者皆軍衛之弊也。凡此十事皆國家大故。乞明諭所司速行改革。如其不悛。治以重罪。庶臣工知警。紀綱整肅。奏上。諸大臣被詰責。皆惡真。唐賽兒之亂。山東方面多伏法。乃舉真為按察使。仁宗時。遷左布政使。有能聲。卒官。

楊溥字弘濟。石首人。與楊榮同舉進士。授編修。永樂初。侍皇太子為洗馬。太子嘗讀漢書。稱張釋之賢。溥曰。釋之誠賢。非文帝寬仁。未得行其志也。采文帝事。編類以獻。太子大悅。久之。溥以喪歸。太子命起視事。十二年。東宮遣使迎帝。遲。帝怒。黃淮至。繫獄。楊士奇及金問至。帝益怒。曰。問何人。得侍太子。下法司鞫。連溥。逮繫錦衣獄。家人供食數絕。而帝意不可測。旦夕且死。溥益奮讀書不輟。繫十年。讀經史諸子數周。仁宗

卽位。釋溥。溥出獄。哭大行。伏地不能起。帝亦哭。擢翰林學士。入閣典機務。尋進太常卿。仍兼學士。嘗密疏言事。帝褒答之。賜鈔幣。已。念溥絲已故。久困尤憐之。欲時接見。明年。遂建弘文閣於思善門左。選諸臣有文學者。侍直。王進編修。陳繼楊敬。給事中何澄。日直其中。命溥掌閣事。親授閣印。曰。朕用卿左右。非止問學。欲廣知民事。為治道助。有所建白。封識以進。宣宗卽位。召還內閣。與楊士奇等共事。居四年。以母喪去。起復。秩滿。遷禮部尚書。學士如故。英宗初立。太皇太后臨朝。溥復入內閣。首言。聖帝明王。莫不務學。乞早開經筵。預擇講官。必得學識平正。言行端謹。老成厚重。達大體者數人。供其職。且慎選宮中左右朝夕侍從之臣。太后大喜。一日。太后坐便

殿帝西面立后旁召士奇榮溥及英公輔尚書胡濙諭曰卿等老臣嗣君幼幸同心共安社稷又召溥前曰先帝念卿忠屢形愁歎不意今復得見卿溥泣太后亦泣左右皆悲愴始仁宗為太子居守時以讒故官寮大臣多下詔獄溥及黃淮一繫十年瀕死者數矣仁宗每於宮中言及東宮時事慘然泣下以故太后言之太后又顧帝曰此五臣三朝簡任俾輔後人皇帝萬機宜與五臣共計正統四年進少保武英殿大學士溥後士奇榮二十餘年入閣又嘗直弘文至是乃與士奇榮竝六年歸省墓尋還十一年進少師溥質直廉靜無城府諸大臣論事爭可否或至違言溥平心處之諸大臣皆服比榮與士奇相繼卒越二年溥亦卒年七十五贈太師諡文

定三楊既歿中外大權一歸王振後三年遂挾天子北征乘輿陷沒天下幾失時人追思此三人者在當不及此而後起者爭暴其短以為依違中旨內閣失柄釀成振禍者此三人也

馬愉字性和臨朐人宣德二年進士第一授翰林修撰九年秋特簡史官及庶吉士三十七人進學文淵閣以愉為首正統元年以楊士奇薦與苗衷高穀曹鼐同直經筵進侍讀預修宣宗實錄成進侍讀學士五年詔以本官入內閣參預機務尋進禮部右侍郎十二年卒贈尚書兼學士贈官兼職自愉始愉以文學受知兩朝端重簡默門無私謁論事務寬厚嘗奏天下獄久者多瘐死宜簡使者分道決遣帝納焉邊警

方命將而別部使至。眾議執之。愉言賞善罰惡。為治之本。波及於善。非法乘人之來。執之不武。帝然之。厚遣其使。

高穀字世用。揚州興化人。永樂十三年進士。選庶吉士。授中書舍人。仁宗即位。改春坊司直郎。尋遷翰林侍講。正統十年。由侍講學士。進工部右侍郎。入內閣典機務。景泰初。進工部尚書。兼翰林學士。掌閣務如故。英宗將還。奉迎禮薄。千戶龔遂榮投書於穀。具言禮宜從厚。穀袖之入朝。徧示廷臣。曰。武夫尚知禮。況儒臣乎。眾善其言。欲以聞。王文不可。已而言官奏之。詰所從得。穀對曰。自臣所。因抗章懇請。如遂榮指。帝雖不從。亦不之罪。景泰二年。進少保東閣大學士。易儲加太子太傅。應天鳳陽災。命祀三陵。且賑貧民。七年。進謹身殿大學

士。仍兼東閣內閣七人。言論多齟齬。穀清直持議正。王文由穀薦。數擠穀。穀屢請解機務。不許。都給事中林聰忤權。要論死。穀力救得薄譴。陳循及文構考官劉儼黃諫。帝命禮部會穀覆閱試卷。穀力言儼等無私。且曰。貴胄與寒士競進。已不可。況不安義命。欲因此構考官乎。帝乃賜循文子中式。但黜林挺一人。事得已。英宗復位。循文等皆誅竄。穀謝病。英宗謂穀長者。語廷臣曰。穀在內閣。議迎駕及南內事。常左右朕。其賜金帛襲衣。給驛舟以歸。尋復賜敕獎諭。穀既去位。杜門絕賓客。有問景泰天順間事。輒不應。居四年卒。年七十。穀美丰儀。樂儉素。位至台司。敝廬瘠田而已。成化初。贈太保諡文義。曹鼎字萬鍾。寧晉人。少伉爽有大志。事繼母以孝聞。由鄉舉。

宣德初授代州訓導。願授別職。改泰和縣典史。七年督工匠至京師。疏乞入試。復中順天鄉試。明年舉進士一甲第一。賜宴禮部。進士宴禮部自彙始。入翰林爲修撰。英宗卽位。充經筵講官。宣宗實錄成。進侍講。錫三品章服。五年入直文淵閣。參預機務。初大璫王振用事。一日語大學士楊士奇。榮曰。朝廷事久勞。公等皆高年倦矣。士奇曰。老臣盡瘁報國。死而後已。榮曰。吾輩衰殘。無以効力。當擇後生可任者報聖恩耳。振喜而退。士奇謂榮失言。榮曰。彼厭吾輩矣。一日內中出片紙。令某人入閣。且奈何。及此時。進一二賢者。同心協力。尚可爲也。士奇以爲然。翼日遂列侍讀學士苗衷。侍講學士馬愉。及彙等名以進。於是愉彙被擢用。彙爲人內剛外和。通達

政體。榮旣歿。士奇常病不視事。閣務多決於彙。英宗以爲賢。進翰林學士。吏部左侍郎也。先入寇。振挾帝親征。朝臣交章諫不聽。彙與張益以閣臣扈從。未至大同。士已乏糧。宋瑛朱冕全軍沒。諸臣請班師。振不許。趣諸軍進。大將朱勇膝行聽命。尚書鄺埜王佐跪草中不得請。欽天監正彭德清言。天象示警。若前恐危。乘輿振誓曰。爾何知。若有此。亦天命也。彙曰。臣子固不足惜。王上繫天下安危。豈可輕進。振終不從。前驅敗報踵至。始懼欲還。定襄侯郭登言於彙。益行營趨紫荆。裁四十餘里。駕宜從此入。振欲邀幸其第。不聽。復折而東。趨居庸。未至次。土木寇大集。且遣使通和。帝召彙草詔答之。振急令移營。行列亂。寇騎蹂陣入。帝突圍不得出。擁以去。彙益等

俱及於難。景帝立。贈彙少傅。吏部尚書文淵閣大學士。諡文襄。官其子恩。大理評事。英宗復位。加贈太傅。改諡文忠。復官其孫榮。錦衣百戶。彙弟鼎。由進士。歷吏科都給事中。張益字士謙。江寧人。永樂十三年進士。由庶吉士。授中書舍人。改大理評事。又改修撰。博學強記。詩文操筆立就。三楊雅重之。尋進侍讀學士。正統十四年。入直文淵閣。未三月。遽蒙難以歿。景帝立。贈學士。諡文僖。曾孫琮。進士。嘉靖初。歷官南京右都御史。

明史藁

列傳第三十三終

明史藁

列傳第三十四

光祿大夫 經筵講官明史總裁戶部尚書加七級臣王鴻緒奉敕編撰

蹇 義郭

璣

夏原吉俞士吉

鄒師顏

李文郁

王 直

胡 澐

蹇義字宜之。巴人。初名瑒。洪武十八年進士。授中書舍人。奏事輒稱旨。帝問汝蹇叔後乎。瑒頓首不敢對。帝嘉其篤誠。為更名義。手書賜之。一考當選。特命滿九載。朕且用。義由是朝夕侍左右。小心敬慎。未嘗忤色。建文帝即位。推太祖意。超擢吏部右侍郎。是時齊黃等用事。外與大師。內改制度。義無所建明。充位而已。國子博士王紳。遺書責之。義不能答。燕師入。

率先迎附。遷左侍郎。數月進尚書。時方務反建文之政。所更易者。悉罷之。義從容言於帝曰。損益貴適時宜。前改者過。今必欲盡復者亦過。因舉數事。陳說本末。帝稱善。從其言。永樂二年。兼太子詹事。帝有所傳諭太子。輒遣義能委曲導意。帝與太子俱愛重之。七年。帝巡北京。命輔皇太子監國。義熟典故。達治體。軍國事皆倚辦。舊臣見親用者。戶部尚書夏原吉。與義齊名。中外稱曰蹇夏。滿九載。帝親宴之便殿。褒揚甚至。數奉命兼理他部事。職務填委。處之裕如。十七年。以父喪歸。帝及太子皆遣官賜祭。有詔起復。十九年。三殿災。時敕廷臣二十六人。巡行天下。義及給事中馬俊。分巡應天諸府。問軍民疾苦。黜陟文武長吏。義以國家多事。盡法繩吏。將不勝。斥

太甚者數人。餘多寬假。條興革數十事。奏行之。還治部事。如故。二十年。成祖北征還。入間者言怒太子。逮義繫錦衣衛獄。明年得釋。仁宗即位。義原吉皆以元老。為中外所信。而帝顧念義監國舊勞。尤厚倚之。首進義少保。賜冠服象笏玉帶。兼食二祿。尋進少傅少師。賜銀章。一文曰繩愆糾繆。已復賜璽書曰。曩朕監國。卿以先朝舊臣。擢兼詹事。日侍左右。兩京肇建。政務方殷。卿勞心焦思。不恤身家。二十餘年。夷險一節。朕承大統。贊襄治理。不懈益恭。朕篤念不忘。茲以已意。創製蹇忠貞印。賜卿俾藏於家。傳之後世。知朕君臣共濟艱難。相與有成也。尋命監修太宗實錄。義視原吉尤重厚。慎擇郡守。考察明恕。號為稱職。然不敢專斷。每承顧問。持兩端。使人主自

擇楊士奇於帝前。詰義曰：何過慮？義應曰：恐鹵莽爲後憂耳。帝笑曰：二卿言皆是。楊榮或詆義，帝不直榮。義頓首言：榮無他，卽左右有讒榮者，願陛下慎察。帝復笑曰：吾固弗信也。宣宗卽位，召義原吉嘉勞之，委寄如仁宗時。從征樂安還，賚予甚厚。時議棄交趾，義與原吉力爭，而帝方用士奇言。二人亦不敢堅執，尋命擇使交趾者。義薦伏伯安，口辨。原吉士奇俱曰：使臣奉命以忠信，恃口辨必辱國。帝竟罷伯安，弗遣。義亦弗復言。已而從北巡還，帝以義原吉士奇榮四人者皆已老，賜璽書曰：卿等皆祖宗遺老，昇輔朕躬，今黃髮危齒，不宜復典冗劇，傷朝廷優老待賢之禮。可輟所務，朝夕在朕左右。計論至理，共寧邦家。其專精神，審思慮，益致嘉謨嘉猷。寅亮弼

直，稱朕意焉。明年，郭璉代爲尚書理部務，復賜義銀章，文曰：忠厚寬宏，尋賜新第於文明門內。英宗卽位，齋宿得疾，遣醫視問，所欲言。對曰：陛下初嗣大寶，望敬守祖宗成憲，始終不渝耳。遂卒。年七十三，贈太師，諡忠定。官二子英荃皆尚寶司丞。英有詩名，歷官太常少卿，仍掌司事。子霖中書舍人。璉字時用，初名進，新安人。永樂初，以太學生擢戶部主事，歷官吏部左右侍郎。仁宗卽位，命兼詹事府少詹事，更名璉。宣宗初，掌行在詹事府，尚書蹇義老，輟部務。帝欲以璉代，璉厚重勤敏，然寡學術。楊士奇言：恐璉不足當之。宜妙擇大臣通經術，知今古者。帝乃止。踰年卒，爲尚書。諭以呂蒙正夾袋，虞允文材館錄故事。璉由是留意人才，識進士李賢輔相器，授吏部

主事。後果爲名相。時外官九年考滿。部民走闕下乞留。輒增秩復任。璉慮有妄者。請覆實。從之。璉雖長六卿。然望輕。又政歸內閣。自布政使至知府闕。聽京官三品以上薦舉。旣又命御史知縣。皆聽京官五品以上薦舉。要職選擢。皆不關吏部。正統初。左通政陳恭言。古者擇任庶官。悉由選部。職任專而事體一。今令朝臣各舉所知。恐開私謁之門。長奔競之風。乞杜絕。令歸一。下吏部議。璉遜謝不敢當。事遂寢。正統六年。御史曹恭以災異請罷大臣不職者。帝命科道官參議。璉及尚書吳中侍郎李庸等。被劾者二十人。璉等自陳。帝切責而宥之。璉子亮受賂爲人求官。事覺。御史孫毓等劾璉。乃令璉致仕。而以王直代。

夏原吉字維喆。其先德興人。父時敏。洪武初。以布衣召見。授湘陰教諭。遂家焉。原吉早孤。力學養母。以鄉薦入太學。選入禁中。書制誥。諸生或喧笑。原吉危坐儼然。太祖訶而異之。賜襲衣。擢戶部主事。曹務叢脞。處之悉有條理。尚書郁新甚重之。有劉郎中者。白事多爲新所詰。恨原吉。新嘗劾諸司怠事者。帝欲宥之。請益力。帝怒問誰教若。新頓首曰。堂後書算生教臣。帝乃貫新。下書算生於獄。劉郎中遂言。教尚書者原吉也。帝曰。原吉能佐尚書。汝欲陷之耶。劉郎中與書算生皆棄市。建文初。進本部右侍郎。明年充採訪使。巡福建。所過郡邑。核吏治。咨民隱。濟以寬大。人皆悅服。久之移駐蘄州。成祖卽位。或執原吉以獻。帝釋之。轉左侍郎。或言。原吉建文時用事。

不可信。成祖曰：原吉忠於太祖，以及建文，獨不忠朕耶？遂與蹇義同進尚書，偕義等釐革舊政，建白三十餘事。浙西大水，有司治不效。永樂元年，使原吉行視，且命治之。已復使僉都御史俞士吉、齎水利書賜原吉，而遣戶部侍郎李文郁、大理少卿袁復、陝西參政宋性爲之副。原吉請循禹三江入海故蹟，濬吳淞下流，上接太湖，而度地爲閘，以時蓄洩。從之。役十餘萬。原吉布衣徒步，日夜經畫，盛暑見役夫暴日中，麾其蓋曰：吾何忍獨適？二年春還朝，言水雖由故道入海，而支流未盡疏洩，非經久計。於是原吉復行，浚白茆塘，劉家河，黃浦。九月工畢，水洩蘇松之農田大利。三年還朝，其夏浙西大飢，命原吉、士吉與左通政趙居任往賑，親諭遣之。發粟三十萬石。

給牛種。有請召民佃淤田益賦者，原吉馳疏止之。姚廣孝還自浙西，稱原吉曰：古之遺愛也。亾何郁新卒，召還理部事，首請裁冗食，平賦役，嚴鹽法，錢鈔之禁，清倉場，廣屯種，以給邊蘇民，且便商賈，皆報可。凡中外戶口、府庫田賦盈縮之數，各以小簡書置諸懷，時檢閱之。一日成祖問天下錢穀幾何，原吉對甚悉，以是益重之。當是時，內難新平，論功賞封諸藩，增設武衛百司，廣集生儒，編輯大典。已又發卒八十萬，問罪安南，而使中官造巨艦，浮海通道，東南諸蠻大起，北都宮闕供億轉輸，以鉅萬萬計，皆取給戶曹。原吉經營補綴，悉心計，應之。嘗督軍民輸材北都，詔以錦衣官校從治怠事者，原吉慮犯者衆，告戒而後行，人皆感悅。亾何召還，帝將北巡，命兼

攝行在禮部都察院事。遂扈行。復攝刑部。有二指揮。冒月廩。帝欲斬之。原吉曰。非律也。卽真盜。何以加。乃止。八年。帝北討。輔太孫留守北京。總理行在九卿事。諭曰。朕以房元齡待卿。其盡心輔吾孫。時諸司草創。每旦原吉入朝。獨近展前。參決庶務。朝退。諸曹郎御史環請事。原吉口答手書。不動聲色。北達行在。南啟監國。京師肅然。帝還。賜鈔幣鞍馬牢醴。慰勞有加。尋從還南京。命侍太孫。周行鄉落。訪民事。原吉取釐黍以進。曰。願殿下食此。知民艱。太孫爲嘗之。九載滿。與蹇義皆宴便殿。帝指二人。謂羣臣曰。高皇帝養賢德。以貽朕。欲觀古名臣。此其人矣。已復從北巡。命侍太孫起居。又三年。奉太孫南還。在道隨事納忠。多所裨益。明年。復從北巡。十八年。北京宮

室成。使原吉南召太子太孫。往復馳報。原吉言連歲營建。今告成。宜少寬民力。撫流亾。蠲逋負。明年三殿災。原吉復申前請。亟命所司行之。初以殿災。詔求直言。羣臣多言都北京非便。帝怒殺主事蕭儀。曰。方遷都時。與大臣密議。久而後定。非輕舉也。言者因劾大臣。帝命跪午門外質辨。大臣爭詈言者。原吉獨奏曰。彼應詔無罪。臣等備員大臣。不能協贊大計。罪乃在臣等。帝意解。兩宥之。或尤原吉背初議。曰。吾輩歷事久。言雖失。幸上憐之。若言官得罪。所損不細矣。衆始歎服。原吉雖居戶部。卽他司有大事。帝時以訪原吉。每御便殿。闕門。輒召語。移時。左右莫得聞。退則恂恂。若無預者。交趾平。帝問遷官與賞孰便。對曰。賞費於一時有限。遷官爲後日費無窮也。

帝從之。西域法王來朝。帝欲郊勞。原吉不可及。法王入。原吉見不拜。帝笑曰。卿欲效韓愈邪。山東俘妖黨二千餘人。至原吉請於帝。悉原之。谷王穗叛。帝疑長沙有通謀者。原吉以百口保之。乃得寢。帝將大舉清沙漠。命原吉與禮部尚書呂震。兵部尚書方賓。工部尚書吳中等議。皆言兵不當出。未奏。會帝詔賓。賓力言軍興費乏。請罷兵。遂召原吉問邊儲多寡。對曰。比年師出無功。軍馬儲蓄十喪八九。災眚迭作。內外俱疲。況聖躬少安。尚須調護。乞遣將往征。勿勞車駕。帝立命原吉出理儲開平。而吳中入對如賓言。帝怒。召原吉繫之內官監。并繫大理丞鄒師顏。以嘗署戶部也。賓懼自殺。遂并籍原吉家。自賜鈔外。無他贏積。明年。帝遂出塞。以糧盡引還。其明年。

復出塞。明年又出。還至榆木川而疾。顧左右曰。夏原吉愛我。崩。問至。太子走繫所。呼原吉哭而告之。原吉伏地哭不能起。太子輒令出獄。與謀國事。原吉曰。東南民力竭矣。戎伍疲矣。請南還以紓之。太子復問赦詔所宜。對以賑饑省賦役。罷西洋中使。及雲南交趾采辦。諸道金銀課。悉從之。太子已即位。復其官。方原吉在獄。有母喪。至是乞歸終制。帝曰。卿老臣。當與朕共濟艱難。卿有喪。朕獨無喪乎。遂賜白粲楮幣胡椒之屬。令遣家人護喪。馳傳歸葬。有司治喪事。原吉不敢復言。尋加太子少傅。呂震以太子少師。班原吉上。帝命鴻臚引震列其下。進少保。兼太子少傅。尚書如故。食三祿。原吉固辭。乃聽辭。一祿。賜繩愆糾繆。及正直章。以便言事。兼攝禮部。賜田五

頃建第兩京。原吉重厚不洩。又時時持正論。能回帝意。帝嘗怒李時勉。原吉從容寬譬之得解。已而仁宗崩。太子至自南京。羣臣郊迎。太后獨留原吉。輔襄王居守。宣宗卽位。益親重原吉。明年漢王反。移檄指斥大臣。以原吉格蠲逋詔書不行爲罪首。帝夜召諸大臣議。原吉免冠謝死罪。帝曰。彼借卿爲兵端耳。命坐屏左右密議。楊榮首勸帝親征。帝難之。原吉曰。獨不見李景隆已事邪。臣昨見所遣將。命下卽色變。退語臣等泣。臨事可知。且兵貴神速。卷甲趨之。所謂先人有奪人之心也。榮策善。帝意遂決。原吉從行抵樂安。漢王且降。猶令人繞城晉原吉。師還。賚予加等。賜闔者三人。原吉以無功辭。不聽。三年。賜銀印。文曰。含弘貞靖。又賜翠鑪銀甕玉鉤玉帶。從

遊西苑太液池東苑。宴語甚歡。從北巡。賜寶刀。帝取原吉橐糗嘗之。笑曰。何惡也。對曰。軍中猶有餒者。帝命賜以大官之饌。且犒將士。還輟部務。食祿備顧問。從閱武兔兒山。帝怒諸將慢褻其衣。原吉曰。將帥國爪牙。柰何凍而斃之。帝起入帳內。原吉隨之。帝曰。卿休矣。曰。陛下幸憐臣。諸將瀕死。獨不少念乎。帝曰。爲卿釋之。帝嘗徹御用翰墨具。賜原吉。親繪壽星圖。作詩褒之。及他圖畫甚衆。服食器用銀幣之賜。無虛日。又賜尚方翠甌二。嘗製二玉冠束髮。以一賜原吉。五年春。兩朝實錄成。復賜白金襲衣文綺鞍馬。旦入謝。歸而卒。贈太師。諡忠靖。原吉有雅量。人莫能測其際。僚友有善。卽采納之。有小過。必曲爲掩覆。吏汙所服金織賜衣。懼欲逃。原吉曰。汙可浣

也。又有汗精微書者。吏叩頭請死。原吉勿問。而自入朝引咎。帝命易之。呂震嘗傾原吉。震爲子乞官。原吉反助之請。平江伯陳瑄初欲殺原吉。原吉顧時時稱瑄才。或問原吉。量可學乎。曰。吾幼時有犯。未嘗不怒。始忍於色。中忍於心。久則無可忍矣。又曰。處有事如無事。處大事如小事。嘗夜閱爰書。撫案而歎。筆欲下。輒止者再。妻問之。曰。此歲終大辟奏也。與同列飲他所。夜歸。值雪。過禁門。有欲無下者。原吉曰。君子不以冥冥隨行。其敬慎如此。原吉與義皆起家太祖時。義秉銓政。原吉筦度支。皆二十七年。聲譽相埒。又相善也。義爲人孝友。質實善處僚友間。未嘗一語傷物。而原吉尤持大體。外兼臺省。內參館閣。朝議皆推義善謀。原吉善斷。有古大臣風烈。原吉

子瑄字韞輝。以廕爲尚寶丞。喜談兵。當景帝時。數上章言兵事。有沮者卒不用。終南京太常少卿。子崇文舉進士。爲南吏部郎中。士吉字用貞。象山人。洪武末。舉於鄉。授兗州府學訓導。建文時。上疏論時政得失十餘事。擢監察御史。議論切直。出巡鳳陽徽州。又按湖廣。辯釋疑獄。風紀肅然。成祖卽位。擢左僉都御史。奉使諭朝鮮日本。還奏皆稱旨。賜豸衣楮幣。浙西大水。偕夏原吉等往督農政。湖州遭糧至六十萬石。同事者欲減其數以聞。士吉曰。欺君病民。吾不爲也。具以實奏。悉得蠲貸。明年。爲都御史。陳瑛所劾。與大理少卿袁復同繫詔獄。復竟死獄中。士吉謫爲事官。治水蘇松。旣而復職。命視浙江民瘼。還上聖孝瑞應頌。帝曰。爾爲大臣。不言民間利病。乃

獻諛邪。擲還之。尋出知襄陽府。秩滿遷山東左參議。洪熙改元入覲。帝欲授以清要職。吏部擬太僕卿。帝曰。渠是秀才。可擢詹事。宣宗初。改南京刑部侍郎。被劾致仕卒。文郁。襄陽人。洪武中。由歲貢生爲行人。成祖初。超授通政參議。擢戶部右侍郎。偕夏原吉。治水有勞。以太廟失陪祀。謫戍遼東。居戎所二十載。洪熙元年。召爲通政參議。尋改南京。宣德中。致仕卒。師顏。宜都人。永樂中。任御史。有直聲。遷大理寺丞。署戶部。與夏原吉同下獄。仁宗卽位。釋之。踰年告歸省墓。還至通州。卒。貧不能歸喪。宣宗聞。命驛舟送之。并詔自今京官卒者。皆給驛。

王直字行儉。泰和人。父伯貞。以經術顯。洪武十五年。聘至京

師。應詔者五百餘人。帝親御奉天門試之。伯貞對第一。與論太極復稱旨。授試僉事。分巡廣東雷州。復呂塘廢渠。清鹽法。會罷分巡官。召還爲戶部主事。命尚書趙俊受學。以父喪服闋。不時起。謫居安慶者數年。建文初。復以薦知瓊州府。崖州黎相仇殺。以反聞。且用兵。伯貞捕其首惡數人。復於朝。兵遂罷。瓊田歲常三穫。以賦軍。軍不時受。俟民乏而歛。急則因之以要利。伯貞爲立期。三輸之。而弊絕。居數年。大治。流民來歸者萬三千餘口。憂歸。補肇慶。未之官。卒。直幼而端重。家貧力學。永樂二年。舉進士。改庶吉士。帝善其文。召入內閣。俾屬草。尋授修撰。北巡。留侍皇太子。已復從。帝居北京。遷侍讀。歷事仁宗宣宗。累遷少詹事。兼侍讀學士。正統初。進禮部右侍郎。

學士如故。久之出蒞部事。尚書胡濙悉以部政付直。直處之若素習者。八年代郭璉爲吏部尚書。戶部侍郎奈亨附王振構郎中趙敏。詞連直及侍郎曹義趙新。竝下獄。三法司廷鞫。論亨斬。直等贖徒。帝宥直義。奪亨新俸。帝將親征也。先直率廷臣力諫曰。國家備邊最得上策。謀臣猛將。堅甲利兵。星羅棋布。且耕且守。敵亦不敢深入。今宜固封疆。申號令。堅壁清野。蓄銳以待之。彼疲走耳。何必親御六師。遠臨塞下。以僥倖不可知之勝乎。況秋暑未退。早氣蘊隆。青草不豐。水泉猶塞。士馬之用未充。兵凶戰危。臣誠未見其可。帝不從。命直留守京師。王師覆於土木。率羣臣請太后立皇太子。奉廓王攝國政。已勸卽真。以安反側。議上皆直爲首。而直自以不如于謙。

每事推下之。雍容鎮率而已。加太子太保。景泰元年。進少傅。也先使使議和。且請還上皇。下禮部議未決。直率羣臣上言曰。太上皇惑細人言。輕身一出。至於蒙塵。陛下宵衣旰食。徵天下兵。與羣臣兆姓同心僇力。期滅此朝食。以雪不共戴天之恥。迺者天誘其衷也。先有悔心之萌。而來求成於我。請還乘輿。此轉禍爲福之機也。望陛下俯從其請。遣使往報。因察其誠僞。而撫納之。奉太上皇以歸。少慰祖宗之心。陛下天位已定。太上皇還。不復蒞天下事。陛下第崇奉之。則天倫厚。而天眷益隆。誠古今盛事也。帝曰。卿等言良然。但前後使者五輩往。終不得要領。今復遣使。設彼假送駕爲名。來犯京師。豈不爲蒼生患。賊詐難信。其更議之。已而阿剌使復至。胡濙等

復以爲言。於是帝御文華殿門。召諸大臣及言官。諭以宜絕狀。直對曰。必遣使。毋貽後悔。帝不悅。于謙前爲解。帝意釋。乃曲聽之。羣臣旣退。太監興安。匍匐出呼曰。若等固欲遣使。有文天祥富弼其人乎。直大言曰。廷臣惟天子使。旣食其祿。敢辭難乎。言之再。聲色愈厲。安語塞。乃議遣使。命李實羅綺往。旣行。而瓦剌可汗使復來。直等固請。乃遣楊善等報之。比實還。以也先使至。直與實語。具知也先欲和。上疏請。更遣使齎禮幣往迎。上皇不許。復上疏曰。臣等與李實語。具得彼中情事。其所需衣物資斧者。上皇言也。而奉迎車駕也。先意也。昨者脫脫不花。及阿剌知院來。皆有報使。今也先使以迎請爲辭。乃不遣使與偕。是疑敵而召兵也。遣使與和。迎上皇便。又

不許。已而實自言於帝。帝第報也先書。就令楊善迎歸而已。直等復上言。今北使已發。願本上皇之心。順臣民之願。因彼悔心。遣使往報。以圖迎復。此不待計而決者也。不然衆志難犯。違天不祥。彼將執爲兵端。邊事益棘。京師亦不得高枕臥矣。帝乃命羣臣擇使。直與寧陽侯陳懋等請。仍遣實報曰。俟善歸議之。已而善竟奉上皇還。二年也先遣使入貢。且請答使。直屢疏言。邊備未修。芻糧未積。瘡痍未復。宜如其請。遣使往。以觀虛實。開導其善。不許。無何也先遣騎入塞。以報使爲辭。直與羣臣復請之。卒不許。直等乃上疏言。陛下銳意治兵。爲戰守計。真大有爲之主。然使命不通。難保其不爲寇。宜勅沿邊守臣。發兵遊徼。有警則入保。無事則力耕。陛下於幾務

之暇時召京營總督總兵詢以方略誠接而禮貌之信賞罰以持其後斯戰守可言也帝曰善中書舍人何觀劾直等在先朝阿附權奸今老猾不宜置左右帝怒下觀獄杖而貶之其明年帝欲易太子未發會思明土知府黃玄以爲請帝喜下禮部議胡濙唯唯文武諸臣議者九十一人當署名直有難色陳循濡筆強之乃署竟易皇太子直進兼太子太師賜金幣加等頓足歎曰此何等大事乃爲一蠻酋所壞吾輩愧死矣景帝疾亟直濙等會諸大臣臺諫請復立沂王爲皇太子推大學士商輅草疏未上而石亨徐有貞等奪門迎上皇復位殺王文等疏草留姚夔所嘗出以示郎中陸昶歎曰是疏不及進天也直遂乞休賜璽書金綺楮幣給驛歸直爲人

方面修髯儀觀甚偉性嚴重不苟言笑及與人交恂恂如也在翰林二十餘年稽古代言編纂記注之事多出其手與金谿王英齊名人稱二王以居地目直曰東王英曰西王爲侍郎次當入閣楊士奇不欲也及長吏部益廉慎時初罷廷臣薦舉方面大吏專屬吏部直委任曹郎嚴抑奔競凡御史巡方歸者必令具所屬賢否以備選擇稱得人其子穉爲南國子博士考績至部文選郎欲留侍直直不可曰是亂法自我始也朝廷以直老命何文淵爲尚書佐之文淵去又命王翱部遂有二尚書直爲尚書十四年年益高名德日益重帝優禮之免其常朝比家居嘗從諸佃僕耕蒔擊鼓歌唱諸子孫更迭舉觴上壽直歎曰曩者西楊抑我今不得共事然使我

在閣今上復辟。當不免遼陽之行。安得與汝曹爲樂哉。天順六年卒。年八十四。贈太保諡文端。積仕至翰林檢討。亦以學行稱。曾孫思自有傳。

胡濙字源潔。武進人。生而髮白。彌月乃黑。建文二年。舉進士。授兵科給事中。永樂元年。遷戶科都給事中。建文帝崩於火。或言遜去。諸舊臣多從者。帝疑之。五年。遣濙巡天下。頒御製諸書。并訪張邇過。徧行州縣鄉邑。隱察建文帝安在。濙以故在楚湖南最久。至十四年乃還。母喪乞歸。不許。起爲禮部左侍郎。十七年。復出巡江浙湖湘諸府。二十一年還朝。馳謁帝於宣府。帝已就寢。聞濙至。急起召入。濙悉以所聞對。漏下四鼓乃出。先濙未至。傳言建文帝路海去。帝分遣內臣鄭和數

輩浮海下西洋。至是疑益釋。皇太子監國南京。漢王爲飛語謗太子。帝屬濙廉之。至南京密疏馳上。監國七事。言太子誠敬孝謹無他。帝悅。仁宗卽位。濙陳十事。力言建都北京非便。請還都金陵。省南北轉運供億之煩。帝竝嘉納之。旣聞濙嘗有密疏疑之。轉太子賓客。兼南京國子祭酒。及得疏嘉其忠。欲召用不果。宣宗卽位。就遷禮部左侍郎。來朝留行在禮部。宣德元年。進尚書。漢王反。贊親征。事平。賚予甚厚。給俘奴四人。明年。奏簡黜國子生。年老貌陋。不堪教育者。千有餘人。賜第長安右門外。給閣者二人。賜銀章四。生辰賜宴其第。從北征至會州。尋兼理詹事府事。又兼領行在戶部。時國用漸廣。濙慮歲支不足。蠲租詔下。輒沮格。帝嘗切戒之。然眷遇不少。

替嘗曲宴澗及楊士奇夏原吉蹇義曰海內無虞卿等四人力也英宗卽位詔節冗費澗因奏減上供物及汰法王以下番僧千餘人浮費大省行在禮部印失自劾詔弗問改鑄給之。又失印劾下獄未幾獲印復職年七十乞致仕不許。帝北征留守京師景帝卽位進太子少傅楊善使也先澗言上皇蒙塵久宜附善等進服食不報上皇將還命禮部具奉迎儀澗等議遣禮部迎於龍虎臺錦衣具法駕迎居庸關百司迎土城外諸將迎教場門上皇自安定門入進東安門於東上北門南面坐皇帝謁見畢百官朝見上皇入南城大內議上傳旨以一轎二馬迎於居庸關至安定門易法駕餘如奏給事中劉福等言禮太薄帝報曰朕尊大兄爲太上皇帝尊禮

無加矣福等顧云太薄其意何居禮部其會官詳察之澗等言諸臣意無他欲陛下篤親親耳帝曰昨得太上皇書具言迎駕之禮宜從簡損朕豈得違之羣臣乃不敢言而淮安人龔遂榮者讀書好奇計嘗從寧陽侯討福建賊說降千餘人又僞爲書貽賊使自相殺賊平以功授千戶還居京師微知帝意則爲書投大學士高穀穀袖之以朝與王直等共觀之書言恭讀登極明詔知上皇之出非遊畋無益爲宗社計耳今都人一聞駕旋無不喜躍則人心尚未厭上皇也主上宜率羣臣厚禮郊迎旣入則避位懇辭而後受命不然史冊書之不可磨已因具言唐肅宗迎上皇故事直與澗欲聞之帝且曰此禮失而求諸野也穀亦曰迎復議上上意久不決若

進此書。使上知朝野同心。亦一助也。澹以爲然。都御史王文不可。而給事中葉盛。竟聞之。帝。林聰復劾直澹穀等。皆股肱大臣。有聞必告。不宜偶語齟齬朝政。有詔索書。澹等因以書進。且言。肅宗迎上皇典禮。今日正可倣行。陛下宜躬迎安定門外。分遣大臣迎龍虎臺。帝不悅。曰。第從朕命。無事紛更。詰書所從得。穀曰。得之小隸。隸曰。得之道路。帝怒。索益急。遂榮乃自縛詣闕。下曰。臣實爲此書。冀感動陛下。毋失禮。無他腸。願就死。毋累大臣。下詔獄。獄具。坐。遂榮言事非宜。且不具奏。而爲匿名書。當譴。久之得釋。而迎上皇。竟無加禮。上皇旣居南城宮。澹請明年正旦。率羣臣朝廷安門。不許。是歲加少傅。易太子。加兼太子太師。上皇萬壽節。請令百官拜賀。延安門。

亦不許。都御史王文惡林聰。文致其罪。欲殺之。澹不肯署。遂稱疾。數日不朝。帝使興安問疾。對曰。老臣本無疾。聞欲殺林聰。殊驚悸耳。聰繇是得釋。英宗復位。力疾入朝。遂求去。賜璽書白金楮幣襲衣給驛。官其一子錦衣世鎮撫。澹有三弟。年皆七十餘。鬚眉皓白。燕聚一堂。遂名之曰壽愷。又七年卒。年八十九。贈太保諡忠安。澹節儉寬和。喜怒不形於色。能以身下人。一時稱其德量。然性善承迎。永樂中。奉使嘗獻白雉二。又嘗奏萬壽節。太和山頂金殿。現五色圓光。在禮部屢表賀祥瑞。其智能周身。遇事無矯激。以故歷事六朝。十知貢舉。立朝六十餘年。榮遇不衰。南城人龔謙多妖術。澹薦爲天文生。又薦道士仰彌高。曉陰陽兵法。使守邊。時論譏之。遂榮自獄。

中出居貧投徒自給直聲震朝野及易儲議起復草疏請還政上皇末上而泄復下獄杖幾死遇赦得出攀不能行者數年天順初授指揮僉事

明史藁

列傳第二十四終

明史藁

列傳第三十五

光祿大夫 經筵講官明史總裁戶部尚書加七級臣王鴻緒奉

敕編撰

張 統毛泰亨 王鈍鈍子淪

嚴震直

郁 新 趙 犴

金 忠

師 達 古 朴

劉季篴蔣廷瓚

劉 辰 儀 智子銘

楊 砥

郭 敦 張 本

虞 謙嚴 升

仰 瞻

張統字昭季富平人洪武中舉明經為東宮侍書遷通政司左參議試左通政雲南平出為右參政陞辭帝賦詩一章賜

之。歷左布政使。二十六年入覲。治行爲天下第一。特令吏部勿考。賜璽書曰。曩者討平西南。命官撫守。爾統實先往。於今五年。諸蠻聽服。誠信相孚。克共乃職。不待考而朕知其功。出天下十二牧上。故嘉爾績。命爾仍治滇南。汝往欽哉。統爲布政使。凡十三年。朝士董倫王景韓宜可輩。遷謫其地。統皆接以禮意。或相薦引。凡土地貢賦。法令條格。皆統所裁定。民間喪祭冠婚。咸有定制。務變其俗。滇人遵用之。建文帝立。召爲吏部尚書。詔徵遺逸。士集闕下。統所選用。皆當其才。會修太祖實錄。被旨試翰林編纂官。奏楊士奇第一。士奇由是知名。燕師入。錄中朝奸臣二十九人。統與焉。成祖旣卽位。以茹瑺言。宥仍故職。無何帝臨朝。而歎咎建文時之改官制者。乃令

統及戶部尚書王鈿解職務。月給尚書半俸。居京師。統懼自經於吏部後堂。妻子相率投池中死。統在吏部。值變官制。小吏張祖言曰。高皇帝起布衣有天下。立法創制。規模甚遠。今更之未必勝。徒滋人口。願公力持之。統然其言。而不能爭也。時添設京衛知事。統卽奏授祖。後統自經死。昇尸歸。屬吏無敢視者。唯祖經紀其喪。乃去。時又有毛泰亨者。建文朝爲吏部侍郎。與統同事。統死。泰亨亦死。王鈿字士魯。太康人。元至正間進士。知猗氏縣。洪武中。徵授禮部主事。歷吏部郎中。出爲福建左參議。轉右參政。以廉慎聞。遣諭麓川。却其贈金。或曰。遠人疑且貳。鈿乃受之。以輸雲南官庫。還。遷浙江左布政使。在浙十年。名與張統埒。帝嘗稱於朝。以勸庶僚。建文初。拜

戶部尚書。燕兵入京師。踰城走。爲邏卒所執。成祖卽位。命仍故官。未幾。與統俱罷。統死。鈍承制。再上疏言事。巡視北平山東。事竣。與敕以布政使致仕。旣歸。鬱鬱死。子淪。永樂四年。進士。仁宗時。由翰林。遷鄭靖王左長史。王當祀不齋。淪諫。宣德初。王就藩。累月不視朝。淪又諫。且擬荀卿成相篇。撰十二章以獻。語切。與王不合。帝爲移書讓王。召改戶部郎中。英宗卽位。拜戶部右侍郎。巡撫浙江。有惠政。母喪。起復入覲。留攝部事。尋以老乞歸。卒。王景字景彰。松陽人。洪武初。爲懷遠教諭。以博學應詔。命作朝享樂章。并定藩王朝覲儀。累官山西右參政。坐事謫雲南。建文中。召入翰林。修太祖實錄。以統薦。除禮部侍郎。兼翰林侍講。成祖卽位。擢學士。帝問葬建文帝禮。

景頓首言。宜用天子禮。從之。永樂六年。卒于官。

嚴震直字子敏。烏程人。以富民推擇糧長。歲部糧萬石。至京師。無後期。帝才之。洪武二十三年。特授通政司參議。改戶部郎中。遷工部右侍郎。二十六年。進尚書。時朝廷事營建。集天下工匠於京師。凡二十餘萬戶。震直請戶役一人。人書其姓名所業於官。有役。則按籍更番召之。役者稱便。鄉民訴其弟姪不法。帝付震直訊。具獄上。帝以爲不欺。赦其弟姪。坐事降御史。數雪冤獄。使安南還。條奏利病稱旨。等命修廣西興安縣靈渠。審度地勢。導湘灘二江。浚渠五千餘丈。築泮潭及龍母祠土堤。百五十餘丈。又增高中江石堤。治陡閘三十有六。鑿去灘石之礙舟者。漕運悉通。歸奏。帝稱善。三十年。疏言廣

東舊運鹽八十五萬餘引於廣西。召商中買。今終年所運。纔十之一。請分三十萬八千餘引貯廣東。別募商入粟廣西之糧衛所。支鹽廣東。鬻之。江西南安。贛州。吉安。臨江。四府。便帝從之。廣鹽行於江西自此始。擢右都御史。復坐事降御史。尋復爲工部尚書。建文中。嘗督餉山東。已而致仕。成祖卽位。召見命以故官。巡視山西。至澤州病卒。世傳燕師入京。張統卽自經死。嚴震直奉使至雲南。遇建文君。悲愴吞金而死。考諸國史。非其實也。

郁新字敦本。臨淮人。洪武中。以人才徵。授戶部度支主事。遷郎中。踰年超擢戶部右侍郎。嘗問天下戶口田賦地里險易。應答無遺。帝稱其才。尋進尚書。親王歲祿米五萬石。他賜與

復萬石。新議歲止一萬石。并定郡王以下祿有差。後因邊餉不繼。定召商開中法。令商輸粟塞下。按引支鹽。邊儲以足。夏原吉爲戶部主事。新奇之。諸曹事悉委任焉。建文二年。引疾歸。成祖卽位。召掌戶部事。初轉漕北京。新言淮黃多淺灘。跌坡。運舟艱阻。請別用淺船。載三百石者。自淮河沙河。運至陳州。潁溪口。跌坡下。復用淺船。載二百石者。運至跌坡上。別用大船。運入黃河。至八柳樹諸處。又陸運至衛輝。入衛河。轉輸北京。從之。又言湖廣屯田。所產不一。凡粟穀黍麥之屬。皆令輸官。准米。詔從新言。著爲令。又議公侯伯駙馬儀賓祿。請如文武官例。米鈔兼支。屯田歲收。不能如額者。減十之四五。皆允行。永樂三年。卒於官。帝歎曰。新理邦賦十三年。量計出入。

今誰可代者。特賜棺殮論祭。而召夏原吉還理部事。新長於綜理。密而不繁。其所規畫。後不能易。爲人和易寬博。母喪歸葬。賓客至者數郡。

趙玃字雲翰。夏人。徙祥符。生元末兵亂。母抱匿林間。虎至。母置之地。虎熟視去。稍長。遊郡學。夜臥學舍中。羣狐採麻葉扇玃。謹呼趙尚書苦熱。玃驚。然亦以此自負。洪武中。舉鄉試入太學。使山東稱旨。賜襲衣楮幣。等授兵部職方司主事。圖天下要害。阨塞屯戍所宜以進。帝以爲才。遷武庫員外郎。建文初。遷浙江右參政。策捕海寇有功。成祖時。使交趾。却其餽蒙賞。擢刑部右侍郎。改工部。再改禮部。進尚書。賜宴華蓋殿。仍撤膳羞遺其母。等命詣北京。營仁孝皇后山陵。初玃兩爲都

察院所劾。帝皆宥之。及朝鮮使臣將歸。例有賜賚。玃不以奏。帝怒曰。是且使朕失遠人心。遂下之獄。等得釋。督建隆慶保安永寧諸州縣。撫綏新集。民安其業。還改兵部尚書。丁母艱起復。專理塞外兵事。帝北征。轉餉有方。仁宗嗣位。改南京刑部尚書。宣德五年。南御史張楷劾玃及侍郎俞士吉曠官。有盜繫獄。佯死。驗瘞之。旣而復出掠。巡檢誣蘇州富民爲盜。械送刑部。賂獄吏。縊殺之。由玃等怠縱所致。乃徵玃。旣至。命致仕。正統元年卒。年七十三。玃性精敏。歷事五朝。位列卿。自奉如寒素。然頗諛。永樂中。瑞麥嘉禾。野蠶成繭。月食不見。皆稱賀。帝悉却之。

金忠。鄞人。善易卜。兄戍通州。忠補戍。候給符。其妻抱幼女。

坐縣門階哭且乳。同里相者袁珙。自縣中出。見其乳曰。夫人貴人也。因相忠大貴。當爲尚書。忠貧不能行。珙資之。夫婦附商舟以北。商人失金。使忠占而獲。至北平。編卒伍。因賣卜燕市。市人傳以爲神。僧道衍稱於燕王。燕王將起兵。託疾召忠卜。得鑄印乘軒之卦。曰。此象貴不可言。王何病。王時時命卜。忠猶爲戍卒。自稱小人。常以占示王。勸舉大事。王深信之。遂與密議。燕兵起。自署官屬。授忠王府紀善。守通州。南兵數攻不克。旣命侍帷幄。疑輒問。術益驗。且時進謀畫。遂授長史。贊戎務爲謀臣矣。燕王稱帝。論佐命功。擢工部右侍郎。贊守北京。尋召還。進兵部尚書。忠少嘗讀書曉大義。帝下江南。次子高煦扈從有功。許以爲太子。高煦結淇國公丘福。駙馬王寧

等。勸帝立之。謀已定。獨忠力爭。帝前歷數古適孽事。帝不能奪。而密告解縉。黃淮。尹昌隆。皆以忠言爲是。於是立世子爲皇太子。命忠爲東宮輔導官。以兵部尚書兼詹事府詹事。久之命兼輔皇太孫。帝北征。留忠與蹇義。黃淮。楊士奇。輔太子監國。太子兩進迎鑾表。皆遣忠行。高煦謀奪嫡愈甚。蜚語譖太子。帝還。悉徵官屬下獄。獨不問忠。而密令審察。忠白無是事。帝怒。忠免冠頓首流涕。願連坐以保之。以故太子得無廢。而官僚獲全。忠承顧問。知無不言。然慎密不洩。凡承旨詞察。無不解釋者。好善嫉惡。處僚友不持兩端。退恒推讓之。其長厚多如是。十三年卒。子達生甫。六月。給驛歸葬。命有司治祠墳。復其家。仁宗立。追贈榮祿大夫少師。諡忠襄。官達翰林檢

討遣歸寧波學。支俸讀書。達剛直敢言。自給事中。終長蘆都轉運使。忠有兄華。負志節。忠守通州有功。欲推恩官之。辭不就。徙居東湖。忠卒。召賜金綺。伏闕辭謝。臣野人不用是。成祖目爲迂叟。放還。一日讀宋史。至王倫附秦檜事。放聲長歎。而逝。里中稱爲白雲先生。忠旣貴。其妻封夫人。皆如相者。袁琪言。琪亦以靖難功。官於朝。自有傳。

師達字九達。東阿人。少孤。事母至孝。年十三。母疾。思藤花菜。達出城南二十餘里。求得之。及歸。夜二鼓。道遇虎。達驚呼。天虎舍之去。持還奉母。母疾遂愈。洪武中。以國子生。從御史馮彬。刷卷江西。爲彬所劾。逮至闕下。囚服見帝。偉其貌。釋之。謫御史臺書案牘。攜家至京。自陳母老。乞一官以養。帝憐之。以

爲御史。超遷陝西按察使。獄囚繫千人。浹旬盡決遣。悉當其罪。母憂去官。廬墓側。不飲酒食肉者三年。成祖卽位。召爲兵部右侍郎。轉吏部右侍郎。永樂四年。營建北京宮殿。遣達採木湖湘。以十萬衆入窮山。賈販不通。軍夫艱食。闕道路。召商賈。事以辦。然頗嚴刻。帝念民勞。欲罷役。達言民樂趨事。遂不罷。督之益嚴。民不堪。多從李法良爲亂。後有詔罷採。所在存貯。散遣役夫。達又言。岍高水急。勢不可止。宜順流輸之。於是左中允周幹劾達方命虐民。請罪之。皇太子以帝所特遣。置不問。八年。帝北征。命總督餽餉。達請均量其程。設頓置堡。更遞轉輸。從之。達佐蹇義在吏部二十年。人不敢干以私。仁宗嗣位。進南京戶部尚書。兼掌吏部。宣德二年卒。官。達廉不殖。

生產祿賜皆分宗黨。有子八人。無以自贍。成祖嘗語左右曰。六部扈從臣。不貪者惟達而已。宣宗亦稱其廉正云。

古朴字文質。陳人。洪武中。舉於鄉。爲太學生。奉命清理郡縣田賦圖籍。父喪歸。服闋。隸五軍。斷事理刑。自陳家貧。願得祿養母。帝嘉之。除工部營繕主事。迎母養京師。母歿。官給舟歸葬。服闋。改兵部職方主事。遷武選員外郎。郎中。建文三年。擢兵部右侍郎。成祖稱帝。改戶部右侍郎。轉左。永樂二年。朴奏先奉詔。令江西湖廣及蘇松諸府。輸糧北京。今聞竝患水潦。轉運艱難。而北京諸郡歲幸豐。宜發鈔命有司。增價收糴。減南方運。從之。營建北京。命採木江西。以恤民見褒。車駕北巡。侍皇太子監國。命權吏兵二部。及詹事府事。終成祖世。佐戶

部。仁宗卽位。改南京通政使。尋就拜戶部尚書。出督畿內田檢。師達病。命朴代之。宣德三年。卒於官。初戶部主事劉良不檢。朴考其績下。良乞中貴人求上考。朴不可。良遂誣奏朴罪。朴就逮。成祖察其誣。得釋。他日吏部奏予良誥。仁宗曰。此人素無行。且嘗誣大臣。遂不與誥。良後果以賊敗。朴在朝三十餘年。自郎署至尚書。確然有守。不通干請。卒之日。家無餘資。然畏慎避事。見弊不能革。時論少之。

劉季篋名韶。以字行。餘姚人。洪武中進士。除行人。使雲南四川朝鮮。悉却其餽。帝聞之。賜襲衣及鈔。擢陝西左參政。陝有逋賦。積歲不能輸。有司峻刑督。韶至。與其寮分行郡縣。悉縱械者。緩爲期。民感其德。悉完所逋。陝不產礪砂。而歲有課額。

言於朝罷之。洪渠水溢病民。爲治堰蓄洩。便爲永利。建文中。召爲刑部左侍郎。民有爲盜所引者。逮至。盜已死。乃召盜妻子使識之。聽其辭。誣也。釋之。吏虧官錢。誣千餘人。悉爲辨免。河陽逆旅。朱趙二人異室寢。朱怨家誤殺趙。有司疑朱殺之。考掠誣服。季箎獨曰。是非夙讐。且其裝無可利者。特緩其獄。竟得殺趙者。揚州民胡某。賊夜入其室殺人。遺刀屍傍。刀有私識。則其鄰蘇氏也。官捕鞫之。蘇氏曰。家失此刀久矣。不勝掠誣服。季箎使人懷刀潛察。其鄰一童子識之曰。此吾家物也。真盜乃得。永樂初。纂修大典。以姚廣孝鄭賜監修。命季箎爲之副。八年。坐失出下獄。左遷兩淮鹽運副使。逡巡未行。復下獄。久之始釋。命以儒服。隸翰林院編纂。尋授工部營繕司。

主事。卒於官。時爲兩淮鹽運使者。滑人蔣廷瓚。以清介稱。召爲工部右侍郎。遷貴州布政使。撫輯遠人。具有規畫。卒。黔中。人祀之。

劉辰字伯靜。金華人。少負氣節。喜功名。太祖下婺州。首上謁。署典籤使。方國珍飾二姬以進。辰叱却之。李文忠開省嚴州。辟置幕下。元帥葛俊守廣信。盛冬發民浚城濠。文忠止之。不聽。出不遜語。文忠怒。欲臨以兵。辰請往諭之。俊悔謝。事遂已。尋以親老辭歸。建文中。用薦擢授監察御史。出知鎮江府。勤於職事。瀕江田八十餘頃。久淪於水。賦如故。辰請除之。京口。閘廢。轉漕者道新河出江。舟數敗。辰修故閘。公私便之。漕河。易涸。仰練湖益水。三斗門久廢。辰修築之。運舟旣通。湖下田。

益稔。永樂初。預修太祖實錄。遷江西布政司左參政。奏蠲九郡荒田糧。歲饑。勸富民貸饑者。蠲其徭役。以爲之息。官爲立券。期年而償。辰居官廉勤尚氣。與都司按察使不相得。數爭。坐免歸。起行部右侍郎。復留南京者三年。帝念其老。賜敕及鈔幣。令致仕。踰年復召至京。疾作。遣醫送歸。道卒。年七十八。儀智字居真。高密人。洪武末。舉耆儒。授高密訓導。遷莘縣教諭。擢高郵知州。課農桑。興學校。吏民愛之。永樂元年。遷寶慶知府。土人健悍。獨畏智。相戒不敢犯。召爲通政司右通政。兼右春坊右中允。未幾。遷湖廣右布政使。坐事謫。役通州。六年冬。湖廣都指揮使龔忠入見。帝問湖湘間老儒。對曰。儀智。老儒也。然坐小累斥。卽日召之。旣至。拜禮部左侍郎。十一年正

月辛巳朔。日當食。禮部尚書呂震請朝賀如常。智獨爭以爲不可。會左諭德楊士奇亦以爲言。乃免賀。如智議。十四年。詔吏部翰林院擇老儒侍太孫。士奇及蹇義首薦智。太子曰。吾嘗舉李繼鼎。大悞。悔無及。智誠端士。然老矣。士奇頓首言。智起家學官。明理守正。雖耄。精神未衰。廷臣中老成正大。無踰智者。是日午朝。帝顧太子曰。侍太孫講讀。得人未。太子應曰。舉禮部侍郎儀智。議未決。帝喜曰。智雖老。能直言。元日日食。執議免賀。可用也。特命輔導皇太孫。每進講書史。必反覆啟迪。以正心術爲本。十九年。年八十致仕。後卒於家。贈太子少保。謚曰文簡。季子銘。字子新。宣宗卽位。以侍郎戴綸薦。授行在禮科給事中。九年秩滿。帝念智侍讀舊勞。改銘翰林院修

撰。正統三年。預修宣廟實錄。成遷侍講。後改邠府長史。邠王監國。視朝午門。廷臣劾王振。叫號莫辨人聲。銘獨造膝前。免冠敷奏。卒下令族振。衆譁始息。振黨王毛兩長隨擊死。血漬門軌。門者欲滌去。銘止之曰。勿滌。留與若曹爲鑒。聞者壯之。景帝登極。力贊征伐諸大事。尋以潛邸恩。特授禮部右侍郎。景泰元年。開經筵。詔銘兼經筵官。帝每臨講幄。輒命中官擲金錢於地。任講官遍拾之。號恩典。文臣與者。內閣高穀等外。惟銘與俞山。俞綱。蕭鎡。趙琬。數人而已。尋遷南京禮部尚書。以立懷獻太子故。加太子太保。召改兵部尚書。兼詹事府詹事。蘇州淮安諸郡積雪。民凍餓死相枕。沙灣築河。役山東河南九萬人。責民間鐵器數萬具。銘請之。帝多所貸恤。因災異

言。消弭在敬。天法祖。省刑薄斂。節用愛人。錄皇明祖訓以進。浚見獎納。卒贈太師。諡忠襄。銘少學於吳訥。天性易直。孝友。有父風。長子海。錦衣衛百戶。季子泰。舉於鄉。爲禮科給事中。竝以父恩授云。

楊砥字太用。澤州人。洪武末。由進士授行人司右司副。上疏言。揚雄爲莽大夫。著劇秦美新論。貽譏萬世。董仲舒天人三策。及正誼明道之言。足以扶翼世教。今孔廟有雄無仲舒。宜定二人進退。帝從之。歷官湖廣布政司參議。建文中。言帝堯之德。始於親九族。今宜惇睦諸藩。無自剪枝葉。斥不省。父喪歸廬墓側。成祖卽位。起鴻臚寺卿。乞終制。服闋擢禮部左侍郎。坐巡視河渠失職。降工部主事。改禮部。歷北京行太僕寺

卿兼苑馬寺。吳橋至天津等衛。大水決堤傷稼。砥請開德州東南黃河故道及土河。以殺水勢。帝命工部侍郎蘭芳經理之。定牧馬法。請令民五丁養種馬一匹。每十匹立羣頭一人。五十馬立羣長一人。養馬家歲蠲租糧之半。而薊州以東。至山海諸衛。土地寬廣。水草豐美。其屯軍人。養種馬一匹。租亦免其半。帝命軍租盡蠲之。餘悉從其議。於是馬大蕃息。砥剛介有守。尤篤孝行。母喪哀毀。未至家卒。

郭敦字仲厚。堂邑人。洪武中。以鄉舉入太學。授戶部主事。遷衢州知府。多惠政。衢俗貧者輒焚屍。敦爲厲禁。且立義阡。俗遂革。禁民聚淫祠。敦疾民勤弛其禁。弗聽。疾亦瘳。在衢七年。永樂初。坐累徵耆老數百人。伏闕乞留不得。後廷臣言敦廉

正。召補監察御史。遷河南左參政。調陝西。十六年春。胡濙言敦有大臣體。擢禮部右侍郎。兼太僕寺卿。偕給事中陶衍。巡撫順天。仁宗卽位。以大行喪。不齋宿。降太僕卿。旋進戶部左侍郎。兼詹事府少詹事。宣德二年。進尚書。陝西旱。命與隆平侯張信撫之。請蠲逋賦。賑貧乏。考黜貪吏。罷不急之務。凡十數事。悉從之。歲餘。召還。在部多所興革。罷王田之奪民業者。令民開荒不起科。建漕運議。民運至瓜洲儀真。資衛卒運至京。民甚便之。六年。卒於官。

張本字致中。東阿人。洪武中。自國子生。授江都知縣。燕兵至揚州。御史王彬據城抗。爲守將所縛。本率父老迎降。成祖以滁泰二知州。房吉田慶成。率先歸附。命與本竝爲揚州知府。

偕見任知府譚友德同蒞府事尋擢本江西布政司右參政永樂四年召爲工部左侍郎坐事謫交趾布政司吏仁宗監國奏召爲刑部右侍郎善摘姦卽位拜南京兵部尚書兼掌都察院事召見言時政得失且請嚴飭武備帝嘉納之遂留行在兵部宣德初工部侍郎蔡信乞徵軍匠家口隸錦衣衛本言軍匠二萬六千人屬二百四十五衛所家以三四丁計之數近十萬軍伍且缺誰與防守帝善本言征漢庶人從調兵食庶人就禽命撫輯其衆而錄其餘黨還以軍政久敝奸人用貨脫籍而援平民實伍言於帝擇廷臣四出釐正之時馬大孳息畿內軍民畜牧艱本請分牧於山東河南及大名諸府山東河南養馬自此始晉王濟熿坐不軌奪爵本奉命

散其護衛軍於邊鎮四年命兼太子賓客戶部以官田租減度支不給請減外官俸及生員軍士月給帝以軍士艱不聽減餘下廷議本等持不可乃止陽武侯薛祿城獨石諸戍成本往計守禦之宜還奏稱旨命兼掌戶部本慮邊食不足而諸邊比歲稔請出絲麻布帛輸邊易穀多者三四十萬石少者亦十萬石儲俸頓充六年病卒賜賻三萬緡葬祭甚厚本廉介有執持尚刻少恕錄高煦黨脅從者多不免成祖宴近臣銀器各一案因以賜之獨本案設陶器諭曰卿號窮張銀器無所用本頓首謝其爲上知如此

虞謙字伯益金壇人洪武中由國子生擢刑部郎中遷杭州知府建文中請限僧道田人無過五畝餘以給貧民從之永

樂初召爲大理寺少卿。時有詔建文中。上言改舊制者。悉面陳謙乃言限田事請罪。帝見謙怖。笑曰。此秀才闢老佛耳。釋弗問。命自後奏贖付六科。不必面陳。都察院論誑騙罪。準洪武榜例。梟首以徇。謙奏比奉詔。準律斷罪。誑騙當杖流。梟首非詔書意。帝從之。天津衛倉災。焚糧數十萬石。御史言。王者盜用多。縱火自蓋。逮幾八百人。應死者百。謙白其濫。皆論減七年。帝北巡。皇太子奏謙爲右副都御史。偕給事中杜欽。賑鳳陽淮揚水災。民鬻男女爲奴婢者。出官錢贖還。又命督兩浙蘇松諸府賦。輸南北京。及徐州淮安。富民賂有司。率得近地。而貧民多運北京。謙建議爲四等。丁多糧最少者。運北京。次少者。運徐州。丁糧等。運南京淮安。丁少糧多。存留本土。民

利賴之。坐累免官。復職。偕給事中許能。巡撫浙江。仁宗卽位。尤慎刑獄。改謙大理卿。時呂升爲少卿。仰瞻爲丞。而謙又薦嚴本爲寺正。凡法司及四方所上獄。謙等再四參復。必求其平。謙嘗語人曰。彼無憾斯。我無憾矣。有言謙奏事不密。市恩評事楊時習勸謙不聽。帝怒降謙少卿。超拜時習爲卿。一日楊士奇奏事畢不退。帝問欲何言。得非虞謙乎。曰然。帝曰。吾亦悔之。士奇因具白其誣。具言謙歷事三朝。得大臣體。帝乃出時習。爲交趾按察使。而復謙職。會有詔求直言。謙奏七事。皆見納。宣德二年卒於官。謙工詩。善寫山水。自負才望。工部侍郎蘇瓚。以猥雜班謙上。恒怏怏。時人隘其量云。嚴本字志道。江陰人。少通羣籍。以歷代刑書。惟刑統爲善。傳霖刑統賦。

辭約義博。註者非一。乃著輯義四卷。永樂十一年。以薦徵。蹇義試以律疑。敷析精暢。授刑部主事。侍郎張本掌部事。官吏少當意者。獨重本。疑獄輒俾訊之。奉命使徽。知府餽酒殺。亦却不受。時督辦後期。例罰工。本不忍急責民。或以爲言。本曰。吾辦矣。蓋已寓書其子。鬻田爲工作償也。仁宗立。以刑部尚書金純及謙薦。改大理寺。寺正斷獄者。多以知情故縱。及大不敬論罪。本爭之曰。律自叛逆數條外。無故縱之文。卽不敬情有重輕。可槩入重比乎。謙躓之。悉爲駁正。良鄉民失馬。疑其隣。告於丞。拷死。丞坐決。罰不如法。當徒。而告者坐絞。本曰。丞罪當。告者因疑而訴。律以誣告致死。是丞與告者各殺一人可乎。駁正之。莒屯卒奪民田。民訟於官。卒被笞去。夜盜民

驢以歸。民搜得之。卒反以爲誣。擒送千戶。民被禁勘死。法司坐千戶徒。本曰。千戶生。則死者銜冤。遂正其故。勘罪。蘇州衛卒十餘人。夜劫客舟於河西務。一卒死。懼事覺。誣隣舟解囚。人爲盜。其侶往救。見殺。皆誣服。本疑之曰。解人與囚同舟。爲盜。囚必知之。按驗果得實。本少好彈琵琶。嘗爲酒困。及壯屏聲色。立身方嚴。非禮弗履。年七十八卒。呂升。山陰人。永樂初。爲溧陽教諭。以薦擢江西按察僉事。改福建。所至有清慎聲。入爲大理寺少卿。宣德八年。致仕卒。仰瞻。長洲人。永樂中。由虎賁衛經歷。遷大理寺丞。正統間。宦官王振用事。百官多奔走其門。惟瞻與大理卿薛瑄不往。會與瑄辨殺夫冤獄。益忤振。遂謫戍大同。景泰初。召爲右寺丞。執法愈堅。在位者多不

合。移疾歸。加大理少卿。

列傳三十五

明史藁

列傳第三十五終

明史藁

列傳第三十六

光祿大夫 經筵講官明史總裁戶部尚書加七級臣王鴻緒奉
敕編撰

茹瑞王佐 李至剛 鄭賜

呂震 方賓 吳中

劉觀 金濂 張鳳

石璞 楊善李實 尹旻

李裕戴縉

茹瑞。衡山人。洪武中。由監生除承敕郎。歷通政使。勤職為太
祖所寵。二十三年。拜右副都御史。又試兵部尚書。加太子少
保。尋為真。建文帝即位。改吏部尚書。與黃子澄不相能。刑部

尚書暴昭發其贓罪。出掌河南布政司事。尋召爲兵部尚書。燕兵至龍潭。遣瑞及李景隆王佐。見燕王議和。瑞等見燕王。伏地頓首。流汗浹地。稱萬死不敢仰視。燕王勞瑞等。又頓首不能發一言。燕王曰。公等言卽言耳。何恐至是。久之。又頓首稱奉詔割地講和。燕王笑曰。吾無罪而削爲庶人。今救死。何以地爲。且皇考封諸子。已各有分地矣。其縛奸臣來。吾解甲謁孝陵歸藩。瑞等唯唯頓首退。燕王入京。召瑞。瑞頓首。首勸進。王旣卽位。下詔言。景隆瑞佐及陳瑄。事太祖忠功甚重。封瑞忠誠伯。食祿一千石。終其身。仍兵部尚書。遷其子鑑爲秦府長安郡主儀賓。卽命瑞出營郡主府第。還朝。坐不送趙王。奪爵歸里。旣而爲家人所訟。逮至京。釋還。過長沙。不謁谷王。

王以爲言。時方重藩王禮。谷王又開金川門有功。帝意嚮之。陳瑛遂劾瑞違祖訓。逮下錦衣獄。瑞知不免。命子銓市毒藥。服之。立斃。時永樂七年二月也。法司劾銓毒其父。請以謀殺父母論。後以銓實承父命滅死。與兄弟家屬二十七人。謫戍廣西河池。仁宗立。釋還。宣宗與所沒田廬。瑞居官謹慎。謙和有容。其卒也。人頗惜之。王佐不知所自起。建文時。爲都督同知。成祖稱帝。封順昌伯。食祿千石。出鎮雲南。不法。數被劾。不問。永樂三年秋。廷臣復劾其恣威福。贓巨萬。徵下獄。瘐死。李至剛名銅。以字行。松江華亭人。洪武二十一年。舉明經。選侍懿文太子。授禮部郎中。坐累謫戍邊。尋召爲工部郎中。遷河南右參議。河決汴隄。至剛議借王府積木。作後濟之。建文

中調湖廣左參議。坐事繫獄。成祖卽位。左右稱其才。遂以爲右通政。與修太祖實錄。朝夕在上左右。稱說洪武中事。甚見親信。尋進禮部尚書。永樂二年。冊立皇太子。至剛兼左春坊大學士。直東宮講筵。與解縉後先進講。已復坐事下獄。久之得釋。降禮部郎中。恨解縉中傷之。縉下獄。詞連至剛。亦坐繫十餘年。仁宗卽位得釋。復以爲左通政。給事中梁盛等劾。至剛輩十餘人。當大行晏駕。不病公署。飲酒食肉。恬無戚容。帝念至剛先朝舊人。出爲興化知府。時年已七十。再歲歿於官。至剛爲人敏給。能治繁劇。善傳會。首發建都北平議。請禁言事者挾私。成祖從之。既得上心。務爲佞諛。嘗言太祖忌辰。宜倣宋制。令僧道誦經。山東野蠶成繭。至剛請賀。陝西進瑞麥。

至剛率百官賀。帝皆不聽。中官使真臘。從者逃三人。國王以國中三人補之。帝令遣還。至剛言中國三人。安知非彼私匿。帝曰。朕以至誠待內外。何用逆詐。所建白多不用。妻父麗重法。至剛爲乞免。帝曰。獄輕重外人何以知之。至剛曰。都御史黃信爲臣言。帝怒誅信。初至剛與解縉交甚厚。帝書大臣姓名十人。命縉疏其人品。言至剛不端。縉謫廣西。至剛遂奏其怨望。改謫交趾。

鄭賜字彥嘉。建寧人。洪武十八年進士。授監察御史。時天下郡邑吏被逮無虛日。謫戍者衆。命賜於龍江編次行伍。方暑諸囚憊甚。賜脫其械。俾僦舍止息。周其飲食。病者予醫藥。秩滿當遷。湖廣布政司參議闕。命賜與檢討吳文爲之協心剗。

吏弊。民以寧輯。苗獠畏懷。母喪去服除。改北平左參議。事燕邸甚謹。坐累謫安東屯。建文初。召爲工部尚書。督河南軍。扼燕。成祖入京師。李景隆訐賜罪。亞齊黃逮至。帝曰。吾於汝何如。乃相背耶。賜曰。盡臣職耳。帝笑釋之。授刑部尚書。永樂元年。劾都督孫岳擅毀太祖所建寺。詔安置海南。岳建文時守鳳陽。嘗毀寺材修戰艦。以禦燕軍。燕知其有備。取他道南下。故賜劾之。二年。劾李景隆陰養。命謀不軌。帝令景隆歸第省過。又與陳瑛同劾耿炳文僭侈。炳文自經死。祁陽教諭康孔高朝京師。還在道省母。會母疾留侍。九閱月不行。賜請逮。問孔高罪當杖。帝曰。母子睽數年。一旦相見。難遽舍。況有疾。可矜也。命復其官。三年。李至剛謫。改賜禮部尚書。父喪奪情。

四年六月朔。日當食。陰雲不見。賜言此聖德所感。宜表賀。帝不許。賜言宋盛時有行之者。帝曰。天下大矣。京師不見。如天下見之何。卒不許。西域貢佛舍利。賜因請釋囚。帝曰。梁武元順溺佛教。有罪者不刑。紀綱大壞。此豈可效。賜爲人頗和厚。然不識大體。帝意輕之。爲同官趙玠所間。憂悸卒。帝疑其自盡。楊士奇曰。賜有疾數日。惶懼不敢求退。昨立右順門。力不支仆地。口鼻有噓無吸。語未竟。帝曰。微汝言。幾誤疑賜。賜固善人才。短耳。命予祭葬。洪熙元年。贈太子少保。謚文安。

呂震字克聲。臨潼人。洪武十九年。以鄉舉入太學。時命太學生出稽郡邑壤地。以均貢賦。震承檄之兩浙。還奏稱旨。擢山東按察司。試僉事。入爲戶部主事。遷北平按察司僉事。燕王

舉兵侍燕世子居守永樂初遷真定知府入爲大理寺少卿遷刑部尚書改禮部皇太子監國震壻主事張鶴朝參失儀太子以震故宥之帝怒并震及蹇義下錦衣獄已復職仁宗卽位命兼太子少師尋進太子太保兼禮部尚書宣德元年卒震嘗三奉命省親兩值關中飢令所司出粟賑之還始以聞然無學術爲禮官不知大體太宗皇帝崩遺詔二十七日釋縗服及期震建議羣臣皆易烏紗帽黑角帶近臣言仁孝皇后崩旣釋縗服太宗易素冠布腰絰震勃然變色詆其異已仁宗黜震議竟易素冠布腰絰洪熙元年分遣羣臣祀嶽鎮海瀆及先代帝王陵震祀文武成康便道省母私以妻喪柩與香帛同載而行祀太廟致齋飲酒西番僧舍大醉歸一

夕卒震爲人傾險佞諛永樂七年車駕巡北京帝命禮部定皇太子留守事宜震請常事悉從皇太子處分奏章貯南京六科回鑾日六科通奏制可十一年十四年震再請如前制十七年帝在北京因事索奏章扈從給事中言留南京帝忘震前請曰奏章宜達行在問震豈禮部別有議耶震畏罪對曰無之奏章當達行在三問對如前遂以擅留奏本殺南京右給事中李能衆知能冤畏震莫敢言者尹昌隆之禍由震構之事具昌隆傳永樂時曹縣獻騶虞榜葛刺國麻林國進麒麟震請賀帝曰天下治安無麒麟何害貴州布政使蔣廷瓚言班師詔至思南大巖山有呼萬歲者三震言此山川效靈帝曰山谷之聲空虛相應理或有之震爲國大臣不能辨

其非。又欲因之進媚。豈君子事君之道。郎中周訥請封禪。震力贊之。帝責其謬。震雖累受面斥。然終不能改。金水河太液池冰。具樓閣龍鳳花卉狀。帝賜羣臣觀之。震因請賀不許。而隆平侯張信奏。太和山五色雲見。侍郎胡濙圖上瑞光。椰梅靈芝。震率羣臣先後表賀云。震嘗排夏原吉等。帝數自將北伐。原吉諫。方賓亦諫。帝怒。賓自縊死。帝剉賓屍繫原吉。以震兼領戶兵部事。震亦自危。帝令官校十人隨之。曰。若震自盡。爾十人皆死。震有精力能彊記。才足以濟其爲人。凡奏事。他尚書皆執副本。又與左右侍郎更進迭奏。震既兼三部。奏牘益多。皆自占奏。侍郎不與也。情狀委曲。千緒萬端。背誦如流。未嘗有悞。嘗扈北狩。帝見碑立沙磧中。率從臣讀其文。後

一年。與諸文學臣語及碑。詔禮部遣官往錄之。震言不須遣使。請筆札帝前。疏之。帝密使人拓其本校之。無一字脫悞者。子熊宣宗初立。震數於帝前乞官。至流涕。帝不得已。授兵科給事中。

方賓。錢塘人。洪武中。由太學生授刑部試郎中。數月改兵部。建文中。署應天府事。謫戍廣東。以茹瑺薦。召復兵部郎中。成祖卽位。賓與侍郎劉儁等迎附。特見委用。遂進兵部右侍郎。尋轉左。四年。儁以尚書出征。黎利。賓理部事。有幹才。應務不滯。儁死。進賓尚書。警敏。能揣上意。見知于帝。頗恃寵貪恣。七年。命扈從北京。兼掌行在吏部事。八年。從北征。與內閣胡廣。金幼孜。楊榮。侍郎金純。竝與機密。自後帝北巡。賓輒扈從。十

九年。議親征。尚書夏原吉。吳中呂震。與賓共議。宜且休兵。養民未奏。會帝召賓。賓言糧餉不足。召原吉。亦以不給對。帝怒。遣原吉視糧。開平。旋召還。下獄。賓方提調靈濟宮。中使進香。至。語賓以帝怒。賓懼自縊死。時帝無意殺賓。賓死。帝益怒。戮其屍。

吳中字思正。武城人。洪武末。由監生爲大寧都司經歷。燕王至大寧迎降。遷北平布政司經歷。轉餉捍禦有勞。累遷大理寺丞。歷少卿。進右都御史。建北京。改工部尚書。取材川蜀。還董餽運。從北征。艱歸起復。改刑部尚書。永樂十九年。與方賓等諫北征。忤旨繫獄。仁宗卽位。復其官。加太子少保。仍還工部。宣德元年。坐事奪少保。尋復之。董營繕。私以官木瓦石。遺

中官楊慶。慶作宅甚壯麗。帝登城樓。望見怪之。按問得實。下中獄。法司論中監守自盜。結交內官當斬。帝念中舊臣。赦之。落少保奪祿一年。正統六年。殿工成。進少師。明年卒。年七十。追封荏平伯。謚榮襄。中美容儀。性勤敏。多計算。先後在工部二十餘年。長獻景三陵。奉天華蓋。謹身三殿。乾清坤寧兩宮。皆中所營造。職務填委。規畫井然。諂事中人。不恤工匠。逃匿者動數千。輒請械赴役。湛于聲色。寵妾數十輩。各具衣帶。中隨所至服之。嚴憚其妻。不敢忤。嘗領誥命至。妻旣拜受。命左右取吳中誥來。爲我誦之。聽畢曰。上自爲乎。曰翰林代草耳。妻笑曰。翰林誠知人。終篇何嘗有一廉字。中面赤強笑而已。其語至聞禁中。

劉觀。雄縣人。洪武十八年進士。授太谷縣丞。以薦擢監察御史。三十年。遷署都察院左僉都御史。坐事下獄。尋釋。察私茶。陝西。還調嘉興知府。丁父憂去。永樂元年。擢雲南按察使。未行。拜戶部右侍郎。二年。調都察院左副都御史。時左都御史陳瑛殘刻。右都御史吳中寬和。觀委蛇二人間。務爲容悅。四年。北京營造宮室。觀奉命採木浙江。凡谿谷峻絕地。有一材美者。悉令伐輸。以是爲能。六年。擢禮部尚書。尋以未諳典故。改刑部。七年。坐事爲皇太子所譴責。帝在北京聞之。以大臣有小過。不宜遽折辱。特賜書諭太子。八年。督諸軍平涼州。羌還。坐事謫本部吏。十三年。還職。改都察院左都御史。十五年。督浚河漕。十九年。承命巡撫陝西。考察官吏。仁宗嗣位。命兼

太子賓客。旋加太子少保。時大理少卿弋謙數言事。帝厭其繁瑣。尚書呂震吳中。侍郎吳廷用。希旨劾奏。觀復令十四道御史論其誣妄。以是爲清議所鄙。時未有官妓之禁。宣德初。臣寮宴樂。以奢相尚。歌妓滿前。觀私納賄賂。而諸御史亦貪縱無忌。三年六月朝罷。帝召楊士奇楊榮。至文華門。諭曰。祖宗時。朝臣謹飭。年來貪濁成風。何也。士奇對曰。永樂末已有之。今爲甚耳。榮曰。永樂時。無踰方賓。帝問今日誰最甚者。榮對曰。劉觀。又問誰可代者。士奇榮薦通政使顧佐。帝乃出觀視河道。以佐爲右都御史。於是御史交章劾觀。並其子輻。諸贓污不法事。帝怒。逮觀父子。將置重典。士奇榮乞貸死。乃謫輻戍遼東。而命觀隨往。觀竟客死。七年。士奇請令風憲官考

察奏罷有司之貪汙者。帝曰然。向使不罷劉觀。風憲安得肅。金濂字宗瀚。山陰人。永樂十六年進士。授御史。宣德初。巡按廣東。廉能最。改按江西。浙江捕巨盜。不獲。坐免。盜被執。復官。嘗言郡縣吏多貪濁。宜救按察司。巡按御史。察廉能者。如洪武間故事。遣使勞賚。則清濁分。循良勸。帝嘉納之。用薦遷陝西副使。正統三年。擢僉都御史。參贊寧夏軍務。寧夏舊有五渠。而鳴沙洲七星。漢伯石灰三渠淤。濂請濬之。溉蕪田一千三百餘頃。時詔富民輸米助賑。千石以上。褒以璽書。濂言邊地粟貴。請并旌不及千石者。儲由此充。居三年。詔僉都御史盧睿與更代。歲餘。睿召還。濂復出鎮。尋加右副都御史。與睿代者再。八年秋。拜刑部尚書。安鄉伯張安與弟爭祿。詔逮治。

法司戶部相諉。言官劾濂及戶部尚書王佐。右都御史陳鑑等。俱下獄。數日釋之。福建賊鄧茂七等爲亂。都御史張楷征不克。乃大發兵。命寧陽侯陳懋等往討。以濂參其軍務。比至。御史丁瑄已大破賊。茂七死。餘賊擁其兄子伯孫。據九龍山。拒官軍。濂與衆謀。羸師誘之出。伏精兵入其壘。遂禽伯孫。帝乃移楷討浙寇。而留濂擊平餘賊。未下者。會英宗北狩。兵事棘。召還。言者交劾濂無功。景帝不問。加濂太子賓客。尋調戶部尚書。加太子太保。時四方用兵。需餉急。濂綜核無遺。議上樽節便宜十二事。國用得無乏。而閩賊復起。言官劾濂等養寇。濂輸罪宥之。初。帝卽位。詔免景泰二年天下租十之三。濂檄有司。但減米麥。其折收銀布絲帛者。徵如故。學士江淵以

爲言。濂內慚抵無有。給事中李侃等請詰天下有司違詔故。濂恐事敗。乃言銀布絲帛。詔書未載。若槩減免。國用何資。於是給事御史劾濂失信於民。爲國斂怨。且發其陰事。帝欲宥之。而侃與御史王允上殿力爭。遂下都察院獄。未幾釋之。削官保。調工部。吏部尚書何文淵言理財非濂不可。乃復還戶部。濂上疏自理乞骸骨。帝慰留之。東宮建復官保。五年二月卒。官以軍功追封沐陽伯。謚榮襄。濂剛果有才。所至以嚴辨稱。然接下多暴怒。在刑部。值王振以私怨興獄。而濂持法淡。其爲戶部。厚斂以足用云。

張鳳字子儀。安平人。父益官給事中。永樂八年。從征漠北。歿於陣。鳳登宣德二年進士。授刑部主事。讞江西叛獄。平反數

百人。正統三年。法司坐事盡繫獄。遂擢鳳本部右侍郎。以主事擢侍郎。時未有也。居數年。改南京戶部。適尚書久未補。鳳專主部事。上言留都重地。宜歲儲二百萬石。爲根本計。從之。遂爲令。南京糧儲。以都御史督之。至是命鳳兼督。廉謹善執法。號板張。秩滿進左。景泰二年。用陳循薦。擢尚書。尋改兵部。參贊機務。戶部尚書金濂卒。召鳳代之。時四方兵息。而災傷特甚。帝屢詔寬恤。鳳偕廷臣議上十事。明年復先後議上八事。咸報可。鳳以災傷蠲賦多。國用益詘。乃奏言國初天下田八百四十九萬餘頃。今數旣減半。而水旱率蠲其租。國用何以給。京畿及河南山東無額田。甲方墾闢。乙卽計其漏賦。請準輕則徵租。少助軍國費。給事中成章等劾鳳擅更祖制。楊

穉等復爭之。帝曰。國初都江南。轉輸易。今居極北。可守常制。耶。竟如鳳議。四方報凶荒者。鳳請令御史勘實。議者非之。英宗復辟。調南京戶部。居五年卒。鳳有孝行。性淳樸。故人死。聘其女爲子婦。教其子而養其母。終身同學友蘇洪。好面斥鳳。及爲鳳屬官。猶然。鳳待之如初。

石璞字仲玉。臨漳人。永樂九年。舉於鄉。入國學。選授御史。宣德初。劾鎮守寧夏梁銘下之獄。英宗卽位。遷江西按察使。坐逸囚降副使。璞善斷疑獄。民娶婦三日。歸寧失之。婦翁訟壻殺女。誣服論死。璞禱於神。夢神示以麥字。璞曰。麥者兩人夾一人也。比明械囚。趣行刑。囚未出。一童子窺門屏間。捕入。則道士徒也。叱曰。爾師令爾偵事乎。童子首實。果二道士匿婦。

稿麥中。立捕論如法。在江西數年。風紀整肅。雖婦豎無不知。石憲使者。歷山西左右布政使。工部尚書王邕狷介。爲王振所侮。未衰引年去。振嘗歸蔚州祀墓。璞承奉惟謹。振悅。召代邕爲尚書。處州賊葉宗畱作亂。總兵官徐恭等出征。以璞參其軍事。師未至。宗畱已爲其黨陳鑑胡所殺。巡撫張驥招降鑑胡。賊勢稍息。璞等逗遛無功。爲御史所劾。俟師旋罪之。已而景帝嗣位。召還論功。兼大理寺卿。尋出募山西義勇。還朝。會中官金英下獄。法司劾璞嘗賂英。遂并下璞獄。當斬。特宥之。出理大同軍餉。寇犯馬營。命總督宣府軍務。至則寇已退。還理部事。河決沙灣。命治之。以決口未易塞。濬渠自黑洋山至徐州。以通漕艘。而沙灣決如故。乃命內官黎賢等偕御史。

彭誼助之。於沙灣築石堤以禦決河。開月河。二引水益運河。以殺水勢。決乃塞。東宮改建。加太子太保。璞言京師盜賊多出軍伍間。有獲者輒云。糧餉虧減。妻孥饑凍。故又聞兩畿山東河南被災。窮民多事剽掠。不及今拊循。恐方來之憂甚於邊患。口外守軍。夜行晝伏。艱苦萬狀。今邊疆未靖。宜增餉以作士氣。乃反減其月糧。此實啟盜悞國之端。非節財足用之術。帝深納其言。沙灣復決。璞再往治之。以母憂歸。五年起復。尋改兵部尚書。與于謙協理部事。湖廣苗亂。璞總督軍務討之。英宗復位。命致仕。後以李賢薦。召欲用之。而璞老曠。乃以爲南京左都御史。不能任事。爲門達所劾。罷歸卒。番禺人。永樂中鄉薦。歷山東左布政使。所至有惠政。正統六年。入爲工

部左侍郎。吳中歿。進爲尚書。歸家十五年卒。

楊善字思敬。大興人。年十七爲諸生。成祖起兵。預城守有勞。授典儀。所引禮舍人。永樂元年。改鴻臚寺序班。進鳴贊。坐事繫獄。時同繫者。庶吉士寧海章。樸有方孝孺文集。善給觀之首於官。善復職。而樸被戮。以是爲清議所棄。累進右寺丞。仁宗卽位。擢本寺卿。宣德六年。被劾下獄。褫冠帶。踰月。正統六年。子容詐作中官書。干尚書吳中。罪戍邊。置善不問。久之。擢禮部左侍郎。仍視鴻臚事。十四年八月。扈駕北征。及土木師潰。善間行得脫。年已六十五。足胠不以爲疲也。先將入寇。改左副都御史。與都督王通提督京城守備。寇退。進右都御史。視鴻臚如故。景泰元年。廷臣朝正畢。循故事相率賀於朝房。

善獨流涕曰。上皇在何所。而我曹稱賀乎。衆爲止也。先遣使議和。賜之宴。其使具言。關外十四城。皆爲所困。朝廷遣侍郎李實等。使阿剌知院。而不遣大臣報可汗及太師。事必不濟。尚書王直等奏其言。廷議簡四人爲正副使。與偕行。帝命俟李實還。議之。已而使將返。乃命善及侍郎趙榮爲正使。以都指揮同知王息。錦衣千戶湯胤勣副之。齎金銀書幣往。先是有袁敏者。請齋服御物。問上皇安。不納。及是尚書胡濙等言。上皇蒙塵久。御用服食。宜付善等隨行。亦不報。時也。先欲還。上皇而帝不語及。自齋賜也。先外。善等無他賜。善乃捐已貲。揣彼中所需者。多市以往。既至。其館伴與飲帳中。詫善曰。土木之役。六師何怯也。善曰。時官軍壯者悉南征。王司禮邀

大駕幸其里。不爲戰備。今南征將士歸。可二十萬。又募中外材官技擊。可三十萬。悉教以神鎗火器藥弩。中百步外。洞人馬腹立死。又用策士言。緣邊要害。隱鐵椎三尺。馬蹄踐輒穿。刺客林立。夜度營幕。若後孫。今皆置無用矣。問何故。曰。和議成。歡好若兄弟。安用此。因以所齋遺之。其人喜。悉以語也。先明日善謁也。先亦大有所遺也。先亦喜。善因詰之曰。太上皇帝朝。太師遣貢使必三千人。歲必再賚金幣。載途背盟見攻何也。也。先以削馬價。予帛多。剪裂爲辭。善曰。太師馬歲增價。難繼。微損之。帛剪裂者。通事爲之。事露誅矣。太師貢馬。或劣弱。貂或敝。寧太師意耶。也。先屢稱善。善復曰。太師攻我再屠戮數十萬計。太師部曲寧無損。今還上皇和好如故。中國金

幣日至。兩國俱樂。不亦休乎。也先問上皇歸何以處之。善曰。天位已定。難以再移也。先曰。堯舜如何。善曰。堯讓舜。今兄讓弟。正相同也。知院伯顏帖木兒勸也。先留使臣。而遣使要復上皇位也。先懼失信不可。其平章昂克語善有所邀求。善曰。若齋貨來。人謂太師圖利。今不爾。乃見太師仁義爲好男子。垂史策。頌揚萬世也。先笑稱善。引善見上皇。設宴餞。自彈琵琶。令妻妾奉酒。令善坐。善辭避。上皇命之。乃叩頭坐也。先顧其下。羨中朝使人有禮。八月朔。餞善。即日送上皇還。十五日。善竟奉上皇還都。時競奇善功。而景帝薄其賞。遷左都御史。仍泣鴻臚事。二年。廷臣朝正畢。復修賀朝房。善又曰。上皇不受賀。我曹乃相賀耶。三年正月。加太子太保。六年。以衰老乞

致仕。優詔不許。善狀貌魁梧。應對捷給。然無學術。滑稽多笑。對客鮮莊語。家京師。治第郭外。園多善果。歲時饋公卿戚里中貴。無不得其歡心。王振用事。善媚事之。至是。又與石亨曹吉祥結。天順元年正月。亨吉祥奉上皇復辟。善參其謀。遂封奉天翊衛推誠宣力武臣。特進光祿大夫。柱國興濟伯。歲祿千二百石。賜誥券。世襲。掌左軍都督府事。尚書胡濙。頌善迎駕功。命兼禮部尚書。掌部事。廷試進士。與徐有貞。王驥。竝預讀卷。得卷盡送之。王翱三揖而退。尋改守正文臣。善使瓦剌。攜子四人行。竝得官。又爲從子養子。乞恩得官者。復十數人。氣勢烜赫。招權納賄。于謙。王文之死。陳循。江淵等之竄。善亦有力焉。後爲亨輩所譖。漸疎外。悒悒死。贈興濟侯。諡忠敏。子

宗襲爵。後革奪門功。降襲金吾指揮使孫增尚公主李實字孟誠。合州人。正統十年進士。爲人恣肆。無拘檢。有口辨。景泰初。爲禮科給事中。也先令完者脫歡議和。實請行。擢禮部右侍郎。以往。少卿羅綺爲副。至則見上皇。頗得也先要領。還言也先請和無他意。及楊善往。上皇果還。實官至右都御史。初實使謁上皇。請還京。引咎自責。失上皇意。歸作出使錄詞夸。後竟以居鄉暴橫斥爲民袁敏者。金齒衛知事也。英宗北征。應募從至大同。及駕還。駐萬全左衛。敏見敵騎逼。請留精兵三四萬人扼其衝。而車駕疾驅入關。王振不納。六師遂覆。敏跳還。上書景帝曰。上皇曩居九重。所服者袞繡。所食者珍羞。所居者瓊宮瑤室。今駕陷沙漠。服有袞繡乎。食有珍羞乎。居

有宮室乎。臣聞之。主辱臣死。上皇辱至此。臣子何以爲心。臣不惜碎首刎心。乞遣官一人。或就令臣齋書及服御物。問安塞外。以盡臣子之義。臣雖萬死。心實甘之。命禮部議。竟報寢。尹旻字同仁。歷城人。泉州知府宏子也。舉正統十三年進士。改庶吉士。景帝立。授刑科給事中。時國家多故。旻建白多正議。大隆福寺成。帝將建齋。刑部尚書俞士悅。因請收所梟賊首。釋罪人。荷校者。旻言。士悅體陛下好生之仁。當引古誼。乃因建寺設齋。挾異端以要君。請寘之法。不從。天順初。遷左給事中。奏事殿內。帝偉其貌。欲大用之。擢通政參議。陝西用兵。命往督餉。六年春。上言。大寇已遁。而我師八萬餘人。日供芻粟。悉取之民間。且軍民轉輸。動數百里。牛斃車摧。道途嗟怨。

今東作方輿。豈可捨耒耜供輸輓。近聞平涼民漸逃竄。倘軍興不息。必轉爲盜。邊患未除。隱憂方大。帝以爲然。詔邊臣亟畫戰守。旻復條上安邊十策。母喪起復。擢吏部右侍郎。成化五年轉左。姚夔卒。旻代爲尚書。欲收物情。兼採南北人。銓拔無滯。賢愚皆悅。兩京災異。偕文武大臣。陳時弊十八事。帝多採納。汪直開西廠。旻潛附之。項忠將劾直。具奏令郎中姚瑩請旻署。旻曰。疏出兵部。卽當爲首。瑩曰。公九卿長也。旻怫然曰。今日亦知爲九卿長耶。強署之。而使人報直。直遂逐忠。與旻交益固。帝惑近倖。異端曲藝。咸中旨授官。旻等頻詣左順門。候中官宣旨。翼日仍依故事覆奏。中官亦厭其煩。屬母覆。且令得官者勿廷謝。遂廢舊制。十四年。加太子少保。尋以直

言。加太子太保。久之。又以中旨。加太子太傅。初旻與劉珣王越。澂相結。又善以智數籠絡人。故典銓久。謗議不及。惟大學士萬安。學士彭華。澂疾旻。越翊相繼去。旻勢漸孤。而方士李孜省。貴幸數干。旻不能應。安與孜省比。而傾旻。會兵部郎中鄒襲謫官。指揮張旺等奏留之。下部議。旻請可其奏。安孜省遂譖旻。落太子太傅。仍爲太子少保。而侍郎耿裕黎淳。郎中鄭宏等皆得罪。已復。詔旻子侍講龍諸陰事。下龍詔獄。執訊午門。多所株連。削旻太子少保。以尚書致仕。龍除名。裕淳再停俸。旻有才智。而急功名。素附麗中人。至是爲安等所逐。弘治十八年卒。年八十二。贈太子太保。諡恭簡。

李裕字資德。豐城人。景泰五年進士。授御史。天順中。巡按陝

西。上安邊八事。石彪濫報首功。詔裕覈實。其從父亨以書抵裕。焚其書以實聞。亨亦旋敗。由是有強直聲。都御史寇浚。遇僚屬嚴。惟裕不爲屈。以才擢山東按察使。重囚二百餘人。或經十餘年未判。裕旬月間。決遣殆盡。大峴山賊寨七十餘。裕捕戮其魁。縱脅從。除其逋負。亂遂平。成化初。遷陝西左布政使。俄入爲順天府尹。政聲大著。進右副都御史。總督漕運。兼巡撫江北諸府。濬白塔孟瀆二河。以便漕。張秋南旺及淮安西湖。舊編木捍衝激。勞費無已。裕與郎中楊恭等謀。易以石。遂爲永利。淮鳳方饑。而太僕徵預備馬二萬匹。裕論罷之。在淮六歲。每歲入計事。陳利病多施行。父憂歸。服除。留佐院事。十九年。代戴縉爲右都御史。縉憲紀不立。裕欲振之。御史有



過。或遭箠撻。由是得諷。汪直敗。偕副都御史屠瀟。請雪諸忤直得罪者。帝不悅。奪俸。又坐累調南京都察院。考績赴都。留爲工部尚書。初。吏部尚書尹旻罷。耿裕代之。以持正不爲萬安所喜。而李孜省方貴幸用事。欲引鄉人。乃協謀去耿裕。以裕代之。裕本廉介。負時望。以孜省故名頗損。其銓敘亦平。故事考察。目有四。曰老疾。曰罷軟。曰貪酷。曰不謹。裕言人材質不同。偏執類酷。遲鈍類軟。乞立才力不及一途。以寓愛惜人。才意。帝善之。遂著爲令。孝宗立。言官交章劾。裕進由孜省。裕不平。爲辨誣錄。連疏乞休去。正德中卒。年八十八。戴縉者。南海人。成化二年進士。授御史。性機警。遇事不避。出按浙江。以擊豪強。扶善類爲名。再按蘇松。奏徙常熟革職。參議章表於

邊表素恣橫。民快之。然縉爲人強而多詐。素無行。滿九歲不得遷。益無聊。會西廠罷。汪直寵不衰。帝猶寄腹心。詞外事。縉探知之。與錦衣千戶吳綬謀復西廠。先以疏草示直。乃上疏曰。比以災異論大臣修省。曾不聞進一讜言。去一弊政。惟太監汪直。槌發奸貪。疏釋冤害。濇協公論。乞令兩京大臣自陳。而推誠任直。則宿弊可革。天意可回。因條上四事。帝喜。優旨荅之。初楊暉之獄。直譖大學士商輅。刑部尚書董方。左都御史李賓受賄。帝銜之而未發。縉欲令大臣自陳。濇中帝意。由是輅等先後去位。而西廠復立。直偵事益苛。動毀人家。族勢焰薰天下。其禍實縉成之也。直旣濇德。縉諷吏部超擢。縉亦望都御史。會按獄湖廣。還遷尚寶司少卿。意不滿。益諂事直。

明年。遂超遷右僉都御史。又明年。遷右副都御史。十七年。擢右都御史。代王越掌院事。皆出中旨。不由廷推。直寵衰。調南京工部尚書。直敗。言官交劾。斥爲民。

明史藁

列傳第三十六終



五十二

